

ሌሚሶ ማጻፋ ጊደ ቆፋ

ሌሚሶ ማጻፋይ ቶሴኒኔ ሌሚሶ ሃሳያን ገጊዳ ኦሶኔ አማኖ ቲሚርቲ። ኢዛፔ ዳሪዛ ባጋይ አሳ ዴኦን ሃች ሃች ጋይቲዛ ሃኖታ ገሻሰ ዮቴሰ። ኮይርፔ ዶሚሼ፥ «አጵ ኤራቴላሰ ኮይርይ ጸሳሰ ያሻቴላ» ገዛ ቆፋ ሃሳኢሶን ዶሜሰ። ኢዚካ ታማርሲዛይሲ አማኖ ዋጋን አሲ አፋናይሳ ጸላ ገዶንታ፥ አሲ ባሰ ሃች ሃች ዴኦን ሃናናሰ ቤሲዛ ሎኦ ካንዶኔ ኦፋናሰ ቤሲዛ ሎኦ ኦሶ ጉጂዲ ታማርሴሰ። ሃ ማጻፋ ገዶን አሸኬቴላ ገሻሰ፥ ዳንዳያ ገሻሰ፥ አሳሰ ቃጴቴላ ገሻሲኔ አማኔቴላ ገሻሰ ዳር ቲሚርቲይ ሌሚሶን ኢሜቲዴሰ።

ሃ ማጻፋይ ኦይኪዳ ኩሜላ ቆፋ

ሌሚሶታ ዋሰቲ ጎኤታናኮ ቤሲዛ ኦጌ 1:1-7

አጵ ኤራቴላ ኮያና ማላ ኢሜቲዳ ዞሬ 1:8—7:27

ኤራቴላ ሳባናሰ ዩጾቲዳ ማዛሙሬ 8:1—9:18

ሶሎሞኔ ሌሚሶታ 10:1—29:27

ኣጉሬይ ሃሳይዳ ዮኦታ 30:1-33

ሊሙኤሌ ኣያ ባ ናዛ ታማርሲዳ ቲሚርቲ 31:1-31

ሌሚሶታ ዋሰቲ ጎኤታናኮ ቤሲዛ ኦጌ

1 ሃይቲ ኢሰራኤሌ ካዎ ዳዊቲ ና

ሶሎሞኔ ሌሚሶታ።

2 ሌሚሶቲ አሳይ አጵ ኤራቴላ፥

ቤራኔ ኤራቴላ ሃሳያ

ኣኬካናሰ ማዴቲሰ።

3 ኢሰቲካ ዴኣና ዴኦን

አጵ ኤራቴላ፥

ጸሎቴላ፥ ሱሬ ፒርዳኔ

ሱሬ ሃኖ ታማርሲዛይታ።

4 ኤራቴላ ፓጨዳይታሰ ኣኬካ፥

ናቴላታሰ ኤራቴላኔ

ዋዚናማቴላ ኢሚዛይታ።

5 አጵ ኤራንቻቲ

ሃ ሌሚሶታ ሲዩዲ

ኤራቴል ጉጃቴስ፤
 አኬካንቻ አሳቲካ
 ሎኦ ዘሬታ ኤኬቴስ።
 6 ሄሳ ማላን ሌሚሶታኔ
 ኢስታ ቢርሼላታ፤
 አጽ ኤራንቻታ ሃሳያኔ
 ኢስታ ማሌላ
 አኬካናስ ዳንዳዬቴስ።

7 አጽ ኤራቴላስ ኮይሮይ
 ጎዳስ ያሻቴላ፤
 ኤያቲ ጊዲኮ
 አጽ ኤራቴሊኔ
 ሴራ ካጄቴስ።

ዬላጋ ናይታስ አሜቲዳ ዘሬ
 8 ታ ናዘ!
 ኔ አዋ ዘሬ ኤዘጋ፤
 ኔ አያ ታማርሲዛይሳካ አጎፋ።
 9 ሄሲ ኔ ሁኤስ
 ቦንቾ ካላቻ፤
 ኔስ ቆጄን አሊዛ
 አሌቆ ማላ ጊዳና።

10 ታ ናዘ!
 ኔና ናጋራንቻቲ
 ባሌሊኮ ኤኖ ጎፓ።

11 ኢስቲ ኔና፥ «አኔ ሃያ፤
 ኢሲፌ ቢዲ
 ሱል ጉሳናስ ዙጎስ፤
 ጸሎታካ ዋቆናስ
 ቆቴቲ ኡቶስ።

12 ዱፎይ ሚቲዛ ማላ
 ኑኒካ አኔ ኢስታ
 ፓጸ ዲሺን ሚቶስ፤
 ኑኒ ኢስታ ጨማ ኦላን

- ኦሌቲዛ አሳ ማላ
ኣኔ አሶስ።
- 13 ኮኒ ኣልኦ ሚሽ
ኡባ ዴማና፤
ሂሰቲዲ ኦ ኮላ
ቦንቂ ኤኪዳ
ሚሻን ኩንላና።
- 14 ኦናራ ዙፔታ፤
ዴሚዳዝ ኢሲፌ
ጎኤታና» ጋና።
- 15 ታ ናዘ!
ኢሰታራ ኢሲፌ
ኦጌ ሄሜቶፋ፤
ኢሰቲ ቢዛ ኦጌ ባና ጋዳ
ኔ ቶሆ ዴንሶፋ።
- 16 ጋሶይካ ኢሰቲ ኢታ ሚሽ
ኦላናስ ዋጼቴስ፤
ኣሳ ሱሐ ጉሳናስካ
ጃሜቴስ።
- 17 ካፎይ ዴሊሺን
ኢዛ ኦይካናስ
ያርዴ ዋሊኮ
ኣይኮካ ማዴና።
- 18 ሃይቲ ሃ ኣሳቲ ባንታ
ሱሐ ጉሳናስ ዙፔቴስ፤
ባንታ ሽምፖ ዋጳናስ
ቆቴቲ ኡቴቴስ።
- 19 ቤሶንታ ኦጌራ ጎኣ ዴማናስ
ዋጺዛ ኡባታ ዉርሴላይ
ሃይሳ ማላ፤
ኢሰቲ ሺሺዳ ኣቆታይ
ኢሰታ ሽምፖ ኤኪ ባና።
- ኣጵ ኤራቴሐ ካዲዛይታስ ኢሜቲዳ ሴራ
- 20 ኣጵ ኤራቴላያ
ኦጌ ቦላ ዴኣሺ ዴይጋዉስ፤
ዴቡሻን ባ ቃላ
ጵቁ ሂሰታዳ ዋሳዉስ።
- 21 ኣጵ ኤራቴላያ ጮራ ኣሲ

ሸቂዛሶን ዋሳወሰ፤
ካታማ ጌሊዛ ፔንጌን ኤቃዳ፥

- 22 «ኢንቴኖ ዋዚና ፓጩቶ!
ኢንቴ አዉዴ ጋካናሰ
ኤያቴላ ኦጌ ካላኔ?
ቂልጪዛይቶ! ኢንቴ ቂልጪዛይሳን
አዉዴ ጋካናሰ ኡፋዬቴቲ?
ኤያቶ! ኤራቴላ
አዉዴ ጋካናሰ ኢጸኔ?
23 ታ ሴራን ኢንቴ ሲሚዳሶ፥
ታኒ ታ ቆፋ
ኢንቴሰ ቆንጪሳናኮሺን፤
ታ ቃላካ
ኢንቴና ታማርሳናኮሺን።
24 ታኒ ዴይጊዳ ዋዴ
ኢንቴ ኮዮንታ ኢጸዴታ፤
ታኒ ታ ኩሺዛ ሚጪን
ኦኒካ ዉዴ ጊቤና።
25 ታ ዞሬ ኡባ ካጺዴታ፤
ታ ሴራካ ኤኪቤኬታ።
26 ሄሳ ጊሻሰ
ኢንቴና ሜቶይ ጋኪዛ ዋዴ
ታኒ ኢንቴ ቦላ ሚጫና፤
ባሺ ኢንቴ ቦላ ጋኪዛ ዋዴ
ታኒ ኢንቴ ቦላ ቂልጫና።
27 ባሺ ኣባ ዳምባላ ማላ
ኢንቴና ቃሊዛ ዋዴ፥
ሜቶይ ጎቴ ጫርኮ ማላ
ኢንቴና ዴንሊዛ ዋዴ፥
ቱጋይኔ ዋዬይ
ኢንቴና ሚቲዛ ዋዴ
ታኒ ኢንቴና ቂልጫና።
28 «ሄ ዋዴ ኢሰቲ ታና ዴይጋና፤
ታ ጊዲኮ ኢሰታሰ ኮይኬ፤
ኢሰቲ ታና ሚንሉ ኮያና፤

- ጊዶ አቲን ታና ደሜቴና።
 29 ኢሰቲ ኤራቴል ኢጲዳ፤
 ጎዳሰ ያሻቴል
 ደሪቤቴና።
 30 ታ ዘሬ ኤካናሰ ኮዪቤቴና፤
 ታ ሴራ ኡባ ካጲዳ።
 31 ሄሳ ጊሻሰ
 ኢሰቲ ባንቲ ኦሊዳ
 ኦሶ አይፌዛ ማና፤
 ባንቲ ቆፒዳ
 ቆፋ አይፌካ ካላና።
 32 ዋዚናይ ፓጪዳይታ
 አጼ ኤራቴላፌ
 ሃኮይ ኢሰታ ዋዳና፤
 ባላታ ዉዳ ጳዮይ
 ኢሰታ ጳይሳና።
 33 ጊዶ አቲን ታና ሲዪዛይቲ
 ኡባይ ሳሮን ዳና፤
 አይኮ ሂርጋይ ባይንዳ
 ዋፓን ዳና» ጋዉሰ።

2

አጼ ኤራቴላፌ ቤተዛ አንጆ

- 1 ታ ናዘ! ኔኒ ታ ቃላ ሲዪኮ፥
 ታ አዛዘካ ኔኒ ኔ ዋዚናን ዋሊኮ፥
 2 ኔ ሃይል አጼ ኤራቴላኮ
 ዛሪኮ፥
 ኔ ዋዚና አኬካኮ
 ኔ ዛሪኮ፥
 3 ሻኪ ኤሪሲዛ ኤራቴል
 ኔ ኮይኮ፥
 ኔ ቃላ ጶቁ ሂሰታዳ
 አኬካ ጴይጊኮ፥
 4 ኢዞካ ቢራ ኮይዛ ማላ
 ኔ ኮይኮ፥
 ቆታን ዲዛ አቆታ ማላ
 ኔ ኢዞ ማንላ ኮይኮ፥
 5 ሄ ዋዴ ኔኒ

- ጎዳሰ ያሻቴሰ አኬካና፤
ጸሳካ ሎኤላዳ ኤራና።
- 6 ጎዳይ አጾ ኤራቴሰ
ኢሚዛ ጊሻሰ
ኢዛፔ ኤራቴሊኔ
አኬካይ ቤቴሰ።
- 7 ኢዚ ሱሬታሰ ጸኖ ሚንጄሰ፤
ኢሰታ ቦላ ዋሶይ ባይንዳይታሰ
ጎንዳሌ ጊዳሰ።
- 8 ሱሬ ፒርዳ ኦጌ ናጌሰ፤
ባሰ አማኔቲዛይታ
ሄሜሰ ሚንፌሰ።
- 9 ሄ ዋዴ ኔኒ ጸሎቴሰ፥
ሱሬ ፒርዳ፥
ጌላይ ባይንዳ ፒርዳኔ
ሎኦ ኦጌ ኡባ ሻካ ኤራና።
- 10 ጋሶይካ አጾ ኤራቴሰ
ኔ ዋዚናን ጌላና፤
ኤራቴላይካ
ኔ ሼምፖ ኡፋይሳና።
- 11 ሻኪ ኤርይ ኔሰ ጎንዳሌ ጊዳና፤
አኬካይካ ኔና ናጋና።
- 12 አጾ ኤራቴሰ ኔና
ኢታ አሳታ ኦጌፔ አሻና፤
ጌላ ሃሳይዛይታፔካ ኔና ናጋና።
- 13 ኢሰቲ ጶማ ኦጌን ባናሰ
ሱሬ ኦጌ አጊዛይታ፤
¹⁴ ኢሰቲ ኢታ ኦሶን ኡፋዬቲዛይታ፤
ጌላ ኦጌን ሆምቦጨዛይታ።
- 15 ኢሰታ ኦጌይ ጌላ፤
ኢሰታ ሄሜታይ ሚርቄላ።
- 16 አጾ ኤራቴሰ
ላይማ ማጫሳፌ ናጋና፤
ባ ኢንጻርሳን ጨሚዛሪፔ
ኔና አሻና።
- 17 ኢዛ ባ ዬላጋቴላ
አዚና አጊዳር፤

- ጸሳ ሲንላን ጌሊዳ
ጫቆ ቃላ ካጷዳሮ።
- 18 ኢዚ ሶ ቤሊ ሃይቆሰ ጋሌሰ፤
ኢዚ ኦጌቲካ
ሞይቲሌታ ዱላታን ጋሌቲሰ።
- 19 ኢዚሶ ጌሊዳ
ኦጌካ ጉዬ ሲመና፤
ዴኦ ኦጌካ ዴመና።
- 20 ሃሳ ጊሻሰ ኔኒ
ሎኦ አሳታ ሌሚሶ ካላ፤
ጸሎታ ኦጌን ሃመታ።
- 21 ሱሬ አሳቲ ቢታ ቦላ ጋሞኣና፤
ዋሶይ ባይንዳ አሳቲካ
ኢዚ ቦላ ሚኒ ዳና።
- 22 ጊዶ ኦቲን ኢታቲ ቢታፌ ጳያና፤
አማኔቶንታይቲካ ዶቃሌታና።

3

- ጎዳን አማኔቴላ
- 1 ታ ናዞ!
ታኒ ኔና ታማርሲዛይሳ
ደሳፓ፤
ታ አዛዞታካ
ኔ ዋዚናን ዋላ።
- 2 ኢሰቲ ኔ ላይላ አዲሳና፤
ኢሻሎ ዴኦኔ
ሳሮቴላ ኔሰ ጉጃና።
- 3 ሲቆይኔ ቱማቴላ
ኔፔ ሃሶፌቶ፤
ኢሰታ ኔ ቆጴን ቃቻ፤
ኔ ዋዚናንካ ጸፋ።
- 4 ሂሰቲሶ ኔኒ ጸሳ ሲንላኒኔ
አሳ ሲንላን ሳቤታናኔ
ሎኦ ሱንላ ዴማና።
- 5 ኔኒ ፖሎ ዋዚናን

- ጎዳን አማኔታ፤
ኔኒ ኔ አኬካን ዜምፖፋ።
- 6 ኔኒ ቢዛ ኦጌ ኡባን
ኢዛ ሲንፋሳ፤
ኢዚካ ኔ ቢዛ ኦጌ ሱሪሳና።
- 7 ኔርካ ኔና
አቶ ኤራንቻ ጎፓ፤
ጎዳስ ያያ፤
ኢታፔካ ሃካ።
- 8 ሄሲ ኔ ቦላ ፓያ ዋፋና፤
ኔ ማቄላታካ ጸሊሳና።
- 9 ጎዳ ኔ አቆታን ቦንቻ፤
ቢታይ ኔስ ኢሚዛ አይፌ ኡባፌ
ጸራ ኢዛስ ኢሞን ቦንቻ።
- 10 ኔ ሄሳሶ ኦሊኮ
ኔ ጎታራቲ ኩሚ ፓላሃና፤
ኔኒ ዋይኔ ኡሹ አጊዛሶቲ
ጨፒ ጊ ኩማና።
- 11 ታ ናዘ!
ጎዳ ሴራ ካቶፓ፤
ኢዚ ኔና ሃንቁዛ
ዋዴካ ላንጮፋ።
- 12 አዋይ ባ ሲቁዛ ና
ሴሪዛይሳሶ
ጎዳይካ ባ ዶሲዛ
ና ሴሬስ።
- 13 አቶ ኤራቴሐ ዴማናስ
ዋጺዛ አሲ፥
አኬካካ ባስ ሚሾ
ኦሊዛ አሲ አንጃቲዳዴ።
- 14 ጋሶይካ ኢዚፔ ዴሚዛ ጎኣይ
ቢራፔ ዴሚዛ
ጎኣፔ አቆስ፤
ኢዚፔ ቤቲዛ ጎኣይ
ዋርቃፌ ቤቲዛ ጎኣፔ አቆስ።

- 15 አጽ ኤራቴላ ዘኦ ኢንቁፌ
ኬሂ አልኦ፤
ኔኒ ዴማናሰ አሞቲዛ ኡባይ
ኢዚራ ጊናቴና።
- 16 ኢዛ ኡሻቻ ኩሼን አዲሳ ላይሰ፤
ሃዲርሳ ኩሼን አቆታኔ
ቦንቾ ኦይካዲሰ።
- 17 ኢዚ ኦጌቲ ኡፋይሰዛ ኦጌታ፤
ኢዛ ሄሜቲዛ ኦጌ ኡባይካ ሳሮ።
- 18 ኢዛ ባና ኢዲሚዛይታሰ
ዴኦ ሚላ፤
ኢዞ ኦይኪዛይቲካ አንጃታና።
- 19 ጎዳይ ባ አጽ ኤራቴላን
ሳኦ ሜዲዴሰ፤
ባ አኬካንካ ሳሎታ
ኢሰቲ ዲዛሶን ሚንሊዴሰ።
- 20 ሻፋቲ ኢዛ ኤራቴላን ጎጌቴሰ፤
ሻራቲ ኢራ ኢሜቴሰ።
- 21 ታ ናዞ! ሱሬ ፒርዳኔ
ሻኪ ኤሮ ናጋ፤
ኢሰቲ ኔ ሲንላፌ ሃኮፌቶ።
- 22 ኢሰቲ ኔሰ ዴኦ ጊዳና፤
ኔ ቆጆሰካ አሌቆ ጊዳና።
- 23 ሄ ዋዴ ኔኒ ኦጌን
ሂርጋይ ባይንዳ ሄሜታና፤
ኔ ቶሆይካ ቆጶቴና።
- 24 ኔኒ ኢቺዳ ዋዴ ባባካ፤
ኢቻዳካ
ማልኦ ዲሰኮ ዲሰካና።
- 25 አኬኮንታ ጋኪዛ ሜቶኔ
ኢታታ ቦላ ጋኪዛ
ቆይሳሰ ባባካ።
- 26 አይሰ ጊኮ ጎዳይ ኔሰ
አማኔቲዛዴ ጊዳና፤
ኔ ቶሆይ
ዋጺማዴን ኦይኬቶንታ ማላ
ኢዚ ኔና ናጋና።

- 27 ኔሰ ማዳና ዋልቃይ ዲሺን
ማዶ በፊዛይታሰ
ሎኦ ኦሶ አጎፋ።
- 28 ሃኢ ኔሰ ዲሺን ኔ ሾርዛስ፥
«ሰማዳ ያ፤
ታኒ ኔሰ ዋንቶ ኢማና» ጎፓ።
- 29 ኔናን አማኔቲዲ ኔ ማታን ዲሺን
ኔ ሾርዛ ቦላ
ኢታ ሚሽ ኦላናሰ ሃልቾፋ።
- 30 ኔና ቆሆንታ አሰ
ጋሶይ ባይንዳ ጮ ሞቶፓ።
- 31 ጌኔ ኦሊዛ አሳታ ቁሎፋ፤
ኢሰታ ኢታ ኦጌካ ካሎፋ።
- 32 ጋሶይካ ጎዳይ
ኢታ ኦሊዛይታ ኢጾሰ፤
ጌዶ አቲን ሱሬታሰ ኢዚ
ባ ዋዚና ቆፋ ቆንጨሴሰ።
- 33 ጎዳ ቃንጌሊ
ኢታ ኦሊዛይታ ኬላና፤
ጌዶ አቲን
ኢዛ አንጆይ ጸሎታሶና።
- 34 ኦቶሬቴላን ቂልጨዛይታ ቦላ
ጎዳይካ ቂልጨፍሰ፤
ጌዶ አቲን ባንታና
ካወሺዛይታ ቦንቼሰ።
- 35 አጾ ኤራንቻቲ
ቦንቾ ላታና፤
ኤያቲ ጌዲኮ ካወሻቴላሰ
አጂ ኢሜታና።

4

አጾ ኤራቴላ ጎኦ

- 1 ታ ናይቶ! ኢንቴ አዋ ዞሬ ሲዪቴ፤
ዋዚናን ዋሊ ኤዝጌቴ፤

- እኩካካ እንቴሰ ሚሽ ሂሰቲቴ።
- 2 ታኒ እንቴሰ ሎኦ ቲሚርቴ
ኢሚዛ ጊሻሰ
ታ ቲሚርቴ አጎፍቴ።
- 3 ታኒ ታ ሁኤንካ
ታ አዋሰ ዩላጋ ና፤
ታ አዩይሰካ ሜዲ ኢሲ ና።
- 4 ታ አዋይ ታና ታማርሲሼ፥
«ታ ቃላ ኩሜላ
ዋዚናን ኦይካ፤
ታ አዛዘታካ ናጋ፤
ኔ ሂሰቲኮ ፓጻ ይአና።
- 5 አጶ ኤራቴሉኔ እኩካ ኦይካ፤
ታ ቃላ ደጎፓ፤
ኢዚፔካ ካሬ ኬዘፓ።
- 6 አጶ ኤራቴሉ አጎፋ፤
ኢዛ ኔሰ ጎንዳሌ ጊዳና፤
ኢዘ ሲቃ፤
ኢዛካ ኔና ናጋና።
- 7 አጶ ኤራቴሉ ባይራ፤
ሄሳ ጊሻሰ ኢዞ ይማ።
እኩካይ ኔ አቆዛ ኡባ
ኤኪዛ ጊዲኮካ ኢዛ ይማ።
- 8 ኔኒ አጶ ኤራቴሉ ቦንቻ፤
ኢዛ ኔና
ጶቁ ጶቁ ኦላና፤
ኔኒ ኢዞ ኢዲማ፤
ኢዛ ኔና ቦንቻና።
- 9 ኢዛ ኔ ሁኤን
ሳባ አኪሊሌ ዋላና፤
ቦንቻ ካላቻካ
ኢማና» ጌሰ።
- 10 ታ ናዙ! ታ ጊዛይሳ ኤዘጋ፤
ታ ቃላካ
ኔ ዋዚናን ዋላ፤
ኔ ላይሉ አዱቃና።
- 11 ታኒ ኔና አጶ ኤራቴላ
ኦጌ ካሌላና፤
ሱሬ ኦጌካ ቤሳና።

- 12 ኔ ሄሜታሼ ቆዴታካ፤
ዎጺኮካ ኩንዳካ።
- 13 ታ ቲሚርቲ ሎኤላ ኦይካ፤
ኢዞ ዬዶፋ፤
ኢዛ ኔሰ ዴኦ ጊዲዳ ጊሻሰ
ኢዞ ናጋ።
- 14 ናጋራንቻታ ኦጌ ዬዶፋ፤
ኢታ ኣሳታ ኦጌንካ ሄሜቶፋ።
- 15 ኢዚፔ ሃካ፤ ኢዚን ሄሜቶፋ፤
ኢዚፔ ጉዬ ሲማ፤
ሂሰታዳ ኔ ኦጌይራ ባ።
- 16 ኢሰቲ ኢታ ኦሶንታ ዲሼ
ዲሰኪ ኤሪቴና፤
ኣሰ ቆዴሶንታ ዲሺን
ዲሰኮይ ኢሰታ ኣይፌን ዬና።
- 17 ኢሰቲ ኢታቴላ ካላ ማላ ሜቴሰ፤
ጌኔካ ኡሻ ማላ ኡዬቴሰ።
- 18 ጸሎታ ኦጌይ ሴታ ጋላሰ ጋካናሰ
ፖኢ ፖኢ ቢዛ
ማላዶ ጸልቄ ማላ።
- 19 ጊዶ ኣቲን ናጋራንቻታ ኦጌይ
ሳካና ቆማ ማላ፤
ኢሰቲ ኣዛን ቆዴታናኮካ
ኤሪቴና።
- 20 ታ ናዘ! ታ ጊዛይሳ ኣኬካ፤
ታ ቃላካ ሎኤላ ኤዘጋ።
- 21 ኔ ኣይፌ ሲንፋፌ ሃሶፋ፤
ኔ ዎዚናን ዎላ።
- 22 ጋሶይካ ኢሰቲ ዴሚዛ ኣሳሰ
ዴኦ ኢሜቴሰ፤
ኢሰቲ ኣሳቴላሰካ
ፓያቴላ ኢሜቴሰ።
- 23 ኡባፌካ ቦላራ
ኔኒ ኔ ዎዚና
ሚንፋዳ ናጋ፤
ኣይሰ ጊኮ ዴኦይ ኢዛፔ ፑልቴሰ።
- 24 ኔ ዶናፔ ጌኔ ሃሳያ ዲጋ፤
ኢታ ሃሳያ

- ኔ ማቴርሻፌ ሃሳ።
 25 ኔ ኣይፌቲ ሲቲ ጊዲ
 ሲንሰ ጸሌቶ፤
 ቲሺ ሂስታዳ
 ኔ ሲንሳን ዲዛይሳ ጸላ።
 26 ኔ ቶሆስ ኦጌ ገገሳ፤
 ሱሬ ኦጌ ጸላ ሄሜታ።
 27 ኡሻቶ ሃዲርሲ ጎፓ፤
 ኔ ቶሆ ኢታፔ ናፓ።

5

ላይማቴላፌ ናጌቲሰ

- 1 ታ ናዞ! ታ ኣጶ ኤራቲላ
 ኔ ዋዚናን ዋላ፤
 ታኒ ኣኬካን ዮቲዛ ቃላ
 ሎኤላ ኤዘጋ።
 2 ሄሲካ ዋዚናማቴሰ
 ኔሰ ሚሽ ገዳና ማላኔ
 ኔ ማቴርሻቲ
 ኤራቲሰ ናጋና ማላሳ።
 3 ላይማ ማጫሳ ኢንጸርሳፌ
 ኤሳ ኢሊሎይ ጸኬሰ፤
 ኢዚ ሃሳያይ ኦይሳፌካ
 ኣጲ ሹጌሰ።
 4 ገደ ኣቲን ኢዛ ወርሴላን
 ጎዳሬ ኡላ ማላ ጫማወሰ፤
 ናምኡ ባጋራ ቃንጺዛ
 ቃራ ማሻ ማላ።
 5 ኢዚ ቶሆቲ ዱጌ ሃይቆሶ ቤቲሰ፤
 ኢዚ ታንጎይ ሲቲ ሂስቲ
 ዱጌ ዱፎን ካሌፌሰ።
 6 ኢዛ ዴኦ ኦጌሰ ወዱ ጉኩ፤
 ኢዚ ኦጌቲ ጌላ፤
 ገደ ኣቲን ጌላ ገዲዳይሳካ
 ኢዛ ኤራኩ።

- 7 ታ ናይቶ! ታና ኤዘገቲ፤

- ታ የቲዛ ቃላፔ ከአፒቴ።
- 8 ኢንቴ ኦጌ ኢዚፔ ሃሲቴ፤
ኢዚ ፔንጌራካ አጵፍቴ።
- 9 ሄሲካ ኢንቴ ኢንቴ
ጎባቴላ ሃራታሰ፤
ኢንቴ ላይላካ ሜንጾ ኢታታሰ
ኢንቴ ኢሞንታ ማላሳ።
- 10 አላጋቲ ኢንቴ አቆታን
ካኦንታ ማላኔ
ኢንቴ ዳቡራንካ ሃራ አሳሶይ
ዱሬቶንታ ማላሳ።
- 11 ኢንቴ አሾይ ወሪን፤
ኢንቴ ሜቄላ ጊልቂን
ወርሴላ ላይላን
ኢንቴ ጎታራና።
- 12 ቃሴካ ኔኒ፤
«ታኒ አይሰ ሴራ ኢጸዲና!
ታ ዋዚናይካ ዞሬ
አይሰ ካጲዴ!
- 13 ታና ታማርሲዛይቲ
የቲዳይሳ ኤካቤኬ፤
ታና ዞሪዛይታ
ዞሬዛካ ኤዘጋቤኬ።
- 14 ሄሳ ጊሻሰ ታኒ
ሽቂዳ ዱላታ ሲንላፌ
ጳያና ማታዲሰ» ጋና።
- 15 ኔኒ ኤሊሲዳ ኔ ፑልቶ ሃላፌ
ኡያዳ አሊዛ ማላ
ኔ ማቼይሰ አማኔታዳ
ኢዚ ሲቆን አላ።
- 16 ቤታ ቤታ ማጫሲ
ኡዪዛ ፑልቶ ሃላ ጊዶፓ።
- 17 ኔናቴላ ኔ ማቼይሰ ናጋ፤
ሃራ ማጫሳራ ዚንኦፋ።
- 18 ኔ ማቼያ ኔሰ
አንጃቲዳ ፑልቶ ጊዱ፤
ዬላጋቴላን ኔኒ ኤኪዳ

- ኔ ማቼይራ ኡፋዬታ።
- 19 ሎኢዛ ጋራ ማላኔ
ኡፋይሲዛ ጌኔሳ ማላ፥
ኢዚ ቋንቋቲ ኡባ ዋዴ
ኔና አሌቶ፤
ኢዚ ሲቆይ ኔና ኡባቶ ኦይኮ።
- 20 ታ ናዘ!
ላይማ ማጫሳይ ሲቆን
አይሰ ማሉታይ?
ሃራ አሳ ማቼራ
አይሰ ቆሜታይ?
- 21 ጋሶይካ አሲ ኦሊዛ ኡባ
ጎዳይ ቤዬሰ፤
ኢዚ ሄማቲዛ ሄማታ ኡባ
ፒልጊ ጸሌሰ።
- 22 ናጋራንቻ ኢዚ ኦሊዳ
ናጋራይ ዛሪ ኦይኬሰ።
ኢዛ ናጋራ ገቲይ ኢዛ ቃቼሰ።
- 23 ኢዚ ባ ኤያቲላ ዳሮን
ኦጌ ባላና፤
ባና ሃራና ዳንዳዮንታ
ኣጊዳ ገሻሰ
ኢዚ ሃይቃና።

6

ሃቻሰ ሃቻሰ ቤሲዛ ዞሬ

- 1 ታ ናዘ! ኔኒ ኔ ሾርዛሰ
ዋሴ ጌሊዳ ጊዲኮ፥
ሃራ አሳ ገሻሰ ኔኒ
ኩሼ ባቃ ጫቂዳ ጊዲኮ፥
- 2 ኔኒ ጌሊዳ ቃላን
ኦይኬቲዳ ጊዲኮ፥
ኔ ዶናፔ ኬኢዳ ቃላን
ኔ ኦይኬቲዳ ጊዲኮ፥
- 3 ታ ናዘ! ኔኒ ኔ ሾርዛ
ኩሼን ኩንዲዳ ገሻሰ
ኔና አሻናሰ ባዳ

- ኢዛ ሲንፋን ኩንዳ፤
ኔ ሾሮዛኮ ባዳ ሾባ።
- 4 ሄሳሶ ኦሶንታ
ዳሼ ዲሰኮፋ፤
ኔ ሲጸንፋቲ ሊጽፎቶ።
- 5 ሻንካንቻታፔ ጌኔሲ
ኬሲ ኤኪ ኣቲዛ ማላ፤
ያርዴን ኦይኬቶንታ ኣቲዳ
ካፎ ማላ ኔና ኣሻ።
- 6 ኔኖ ኣዛላዞ!
ጨንጨሌታኮ ባ፤
ሂሰታዳ ኢሰታፌ ታማራዳ
ኣቶ ኤራንቻ ጊዳ።
- 7 ጨንጨሌታሰ ኣዛዚዛይ ዴና፤
ኢሰታ ሃሪዛይ ዴና።
- 8 ጊዶ ኣቲን ባንታሰ ማና ሚሽ
ቦኔ ሺሼቴሰ፤
ካል ሺሺዛ ዎዴ
ባንታሰ ካል ሺሼቴሰ።
- 9 ኔኖ ኣዛላዞ!
ኔኒ ኣዉዴ ጋካናሰ
ዲሰካኔ?
ዲሰኮፌካ
ኔ ኣዉዴ ቤጋኔ?
- 10 «ታኒ ጉፋራ ዲሰካ ኤካና፤
ጉፋራ ሊጳ ዴንዳና፤
ታ ኩሼ ቦርኮታዳ
ጉፋራ ሹምፓ ኤካና»
ኔ ጊሺን፤
- 11 ሄ ዎዴ ማንቆቴል
ፓንጋ ማላ፤
ፓጨይ ኦላ ሚሻ
ኦይኪዳ ኣሳ ማላ
ኔ ቦላ ፑቱ ጋና።

- 12 ዋማሌይኔ ሜንጾ ኢታ ኣሲ
 ዩዩ ዩዩዲ
 ኢታ ቃላ ሃሳይዛይ፥
 13 ባ ኣይፌራ ቂምኦቲዛይ፥
 ባ ቶሆን ቤሲዛይ፥
 ባ ቢራጴታንካ ማላቲዛይ፥
 14 ባ ዋዚናን ኢታ ሚሽ
 ዋሒ ዴንሒ ቆፒዛይ
 ኣይ ዋዴካ ኦሽ ዴንሒ።
- 15 ሄሳ ጋሶን ባሺ ኣኬኮንታ
 ኢዛ ቦላ ያና፤
 ኢዚ ሃሳኣይ ባይንዳ ሜቃና፤
 ሜቂዲካ ፓጾና።
- 16 ጎዳይ ኢጸዛ ኡሱፑን
 ዮኦቲ ዴቴሰ፤
 ላፑንፋዛ
 ኬሂ ሃራሴቴሰ።
- 17 ኦቶሬቴፋን ጸሊዛ ኣይፌ፥
 ዋርዶቲዛ ኢንጸርሰ፥
 ጸሎ ኣሳታ ዋጲዛ ኩሼ፥
 18 ኢታ ሚሽ ቆፒዛ ዋዚና፥
 ኢታሶ ኤሶቲዛ ቶሆታ፥
 19 ዋርዶ ቦላ ዋርዶ ጉጂ ጉጂዲ
 ዮቲዛ ዋርዶ ማርካ፥
 ኢሻንታ ጊዶን
 ኦሽ ሜጲዛ ኣሳ።
- ላይማፔ ሃኮ
- 20 ታ ናዘ! ኔ ኣዋ ኣዛዘ ፖላ፤
 ኔ ኣያ ታማርሲዳይሳካ ኣጎፋ።
- 21 ኢሰታ ኡባቶ ኔ ዋዚናን ኦይካ፤
 ኔ ቆጴንካ ቃቻ።
- 22 ኔኒ ሄሜቲዛ ዋዴ
 ኢሰቲ ኔና ካሌፋና፤
 ኔኒ ኢቺዛ ዋዴ
 ኢሰቲ ኔና ናጋና፤
 ኔኒ ቤጎቲዛ ዋዴካ
 ኢሰቲ ኔና ዘራና።

- 23 አይስ ጊኮ ሃ አዛዘቲ ነስ ጸምፔ፤
 ቲሚርቲቲካ ፖኦ፤
 ቃሴ ሴራይካ
 ዴኦኮ ኤፊዛ ኦጌ።
- 24 ሃ አዛዘቲ ኢታ ማጫሳፊ
 ኔና ናጋና፤
 ዶናን ጨሚዛ ሃዉሻ
 ማጫሳፊካ ናጋና።
- 25 ኢዚ ሎኤቴላ
 ኔ ዋዚናን አሞቶፋ፤
 ኢዚ ቂምኦቴላን ኦይኬቶፋ።
- 26 ኢሲ አዴይ
 ባና ባይዛ ዲዛ ማጫሳዮ
 ጉላ ሚሻን
 ዴማናሰ ዳንዳዬስ፤
 አሳ ማቺ ጌዶ ካሎይ
 ነስ ሼምፖ ዳይሳና።
- 27 ኢሲ አሲ ታማ ኢዲሚን
 ኢዛ ማይኦይ
 ሜቴቶንታ አታናሰ ዳንዳይዜ?
- 28 ኢሲ አሲ ቦንቆ ታማ ዬዲ ቢሺን
 ኢዛ ቶሆይ
 ጸጌቶንታ አታና ዳንዳይዜ?
- 29 አሳ ማቸ ላጌሊዛ አሲ
 ሄሳ ማላ፤
 ኢዞ ቦቺዛ ኡባይ
 ቃጸዬቶንታ አቴና።
- 30 ካይሶይ ጋፋ አታናሰ ካይሲኮ
 አሳይ ኢዛ ካዴና።
- 31 ጊዶ አቲን ኢዛሰ ዲዛ አቆታ
 ኡባ ኦይቺኮካ
 ኢዚ ኦይኬቴዳ ጊዲኮ
 ላፑን ኩሼ ቃንጸና ቤሴስ።
- 32 ላይማ ላይማቲዛ አሳሰ
 ዋዚናይ ፓጩ፤
 ሄሳዴይ ባርካ
 ባ ሼምፖ ዳይሴስ።

- 33 ቡካይኔ ካዉሻቴሉ ኢዛሰ ቃዳ፤
 ዬላቴሉ ኢዛፔ
 ሙሌካ ቁጨቴና።
- 34 ቃናቴይ ኣዚና ሃንቄታና ማላ ዴንፊፊሰ፤
 ኢዚ ሃሎ ኬሲዛ ዎዴ
 ኢዛሰ ቃጴቴና።
- 35 ኢዚ ኣይ ኤዳካ ኤኬና፤
 ኣይ ኬና ኢሞታይካ
 ኢዛ ሃንቆ ዶሺሴና።

7

- ላይማፔ ናጌታና ማላ ኢሜቲዳ ሴራ
- 1 ታ ናዞ! ታ ቃላ ናጋ፤
 ታ ኣዛዞካ ኔ ዎዚናን
 ቁምኣ ኦይካ።
- 2 ኔ ፓጸ ዴኣና ማላ
 ታ ኣዛዞታ ናጋ፤
 ታ ቲሚርቴዛካ
 ኔ ኣይፌ ጨሮ ማላ ናጋ።
- 3 ሃይታ ኔ ቢራጴታን ቃቻ፤
 ኔ ዎዚናንካ ጸፋ።
- 4 ኣጶ ኤራቴሰ ኔ ታሰ ሚቾ ጋ፤
 ኣኬካካ ኔ ታሰ ዳቦ ጋ።
- 5 ኢሰቲ ኔና ላይማ ማጫሳፌኔ
 ባ ቃላን ባሌሉዛ
 ሃዉሻ ማጫሳፌ ናጋና።
- 6 ኢሲ ጋላሰ ታኒ
 ታ ኬላ ማሰኮቴዛራ
 ካሬ ጸላዲሰ።
- 7 ኣኬካይ ፓጨዳ ዬላጋታ ቤኣዲሰ።
 ኢሰታ ጊዶፌ ኢሶይ ኬሂ ኤያ።
- 8 ሄ ዎዳላይ ኢዚ ሶ ኤፊዛ
 ኦጌ ባጋራ ኦይኪ ቢሼ
 ኢዚ ኬላ ኣቻራ
 ኣጲ ቢሺን፤
- 9 ሄ ዎዴ ሳኣይ ቃማናሰ
 ላንኪላንኪሺን፤

ቋማይ አይፌ ኮይኪሽን፤

10 ኢሲ ማጫሳያ
ኢዛ ደማናሰ ኬዛዱሰ፤
ላይማ ማጫሳ ማይኦ ማይኦ
ባሌፋናሰ ሙርታ ኬዛዱሰ።

11 ኢዛ ጸላኔ
ዬላይ ባይንዳ ማጫሳ፤
ሶሆን ዋፑ ጋዳ ኡቱኩ።

12 ኢዛ ኢሲቶ ኦጌን፤ ኢሲቶ ጉላን፤
ኢሲቶ ዱቡሻን ኤቃዳ ናጋዉሰ።

13 ኢዛ ሄ ናዛ
ሺሻ ኦይካዳ ዬራዉሰ፤
ዬላይ ባይንዳ ኢዛ አይፌ
ቲሺ ሂስታ ጸላሼ፤

14 «ታኒ ታሶን ኢሲፌቱላ ያርሾ
ያርሻናሰ ቤሴሰ፤
ታኒ ታ አዲና ሃቶ ፖላዲሰ።

15 ሂስታዳ ኔና ጸላናዉ ኬአዲሰ፤
ኔና ኬሃ ኮያዲሰ፤
ሃኢ ቤያ ኔና ደማዲሰ።

16 ታኒ ጊብጾፔ ዪዳ
አሌቂሲዛ አንሶላካ
ታ ሂጸን ዬጋዲሰ።

17 ታኒ ካርቤ፤ አልሙኒዬሜኔ
ቃራፋ ጌቱቲዛ
ሳዋታፔ ኦሴቲዳ
ሺቶ ታ ሂጸን ጫጫፋዲሰ።

18 ሃ ያ፤ አኔ ዋንታና ጋካናሰ
ሲቆ አሎሰ፤
ቆሜቲዲካ ኡፋዬቶሰ።

19 ታ ኬላዋይ ሶን ዴና፤
ሃኮ ዴሬ ቢዴሰ።

20 ሚሽ ካራጺቱ ኩንሴ
ኤኪ ቢዳ ጊሻሰ
አጊናይ ዶርሰ ዳጋንፉንታ
ሲሜና» ጋዲሰ።

- 21 ሂስታዳ ባ ማልኦ ሃሳያን
ኢዛ ባሌላዲስ፤
ባ ሊቆ ኢንጻርሳንካ ጨማዲስ።
- 22 ሹካስ ላጌቲ ቢዛ ቦራ ማላ፤
ዋጺማዴን ኦይኬታና
ቢዛ ጮፎሽ ማላ
ሄራካ አሙሶንታ
ኢዙ ካሊዲ ቢዴስ።
- 23 ዋንዳፌ ዪሺ
ኢዛ ቲሬ ጫዳና ጋካናስ፤
ኢዛ ሸምፖ ዳይሳናይሳ
ኤርንታ ዲሺ ፒራዲዲ ያርዴን
ጌሊዛ ካፎ ማላ ጊዲዴስ።
- 24 ታ ናዘ! እኔ ሃኢ ሲያ፤
ታ ደናፔ ኬዚዛ
ቃላካ ኤዘጋ።
- 25 ኔ ዋዚናይ ኢዚኮ ቦፖ፤
ኢዛ ቢዛ ባላ ኦጌን ጌሎፓ።
- 26 ኢዛ ካወሻዳ ኦሊዳይቲ ኡንዴና፤
ኢዛ ዋዲዳይታ ቆዳይ
ኬሂ ዳሮ።
- 27 ኢዚ ሶይ ዲፎን ኤፊዛ ኦጌ፤
ሄ ኦጌይ ዲጌ ሃይቆሶ ጋሌስ።

8

እቶ ኤራቴላ ሳባ

- 1 ሲዪቴ! እቶ ኤራቴላያ ባ ቃላ
ዶቁ ሂስታ ጾይጌኬ?
እኬካይካ ባ ጨንጉርሳ
ዶቁ ሂስታ ሲሴኬ?
- 2 ኦጌ ደናን ዳኢዛ
ዙምቡላታ ቦላኔ
ዳጋላ ኦጌታን ኤቃወስ።
- 3 ጊምቤዛ ላንቄን ካታማታ
ጌሊዛ ፔንጌን ኤቃዳ
ባ ቃላ ዶቁ ሂስታዳ፤

- 4 ሃይቶ አሳቶ!
 ታኒ አንቴና ጾይጋይሰ፤
 ታኒ አሳ ዘሬሐ ኡባ ጾይጋይሰ።
- 5 አንቴኖ አኬካይ ፓጪዳይቶ!
 ዋዚናማ ጊዲቴ፤
 አንቴኖ ኤያቶ አኬካ ዳሚቴ።
- 6 ታኒ ጎኢዛ ሚሽ
 ዮቴዛ ጊሻሰ ኡዝጊቴ፤
 ታ ዶናፔ ሱሬ ዮኦይ ኬዜሰ።
- 7 ታ ዶናይ ቱማ ሃሳዬሰ፤
 ታ ሜቴርሻቲካ
 ኢታ ሚሽ ኢጼቴሰ።
- 8 ታ ዶናፔ ኬዚዛ ቃላቲ
 ኡባይ ቱማ፤
 ጌላ ዋይኮ ቦካ ጊዴቴና።
- 9 አኬካይ ዲዛ አሳሰ
 ታ ሃሳያይ ሊኬ፤
 ኤራቴሌ ዲዛይታሰ
 ታ ሃሳያን ዋርዶይ ዳና።
- 10 ቢራፔ አሌዲ ታ ዘሬ ኤከቴ፤
 ሙሩታ ዋርቃፌ አሌዲ
 ኤራቴሐ ዶሪቴ።
- 11 አይሰ ጊኮ፥ «ታኒ አጼ ኤራቴሌ
 ዘኦ አንቁፊካ ኬሃ አልአይሰ፤
 ኔኒ አሞቲዛ ሚሽ ኡባይካ
 ታናራ ጊናታናሰ ዳንዳዬና።
- 12 ታኒ አጼ ኤራቴሌ
 አኬካራ ዳይሰ፤
 ኤራቴሌኔ ዋዚናማቴሌ
 ታ ሚሻታ።
- 13 ጎዳሰ ያሻቴሌ ኢታ ኢጾ፤
 ታኒ ኦቶርኔ ሃላጫ፥
 ሜንጾ ኢታቴሌኔ
 ጌላ ሃሳያ ኢጳይሰ።
- 14 ዘሬይኔ ሎኦ ፒርዳይ ታይታ፤
 ታሰ አኬካይኔ ዋልቃይ ዴሰ።
- 15 ካዋቲ ታናን ካዋቴቴሰ፤

- ዴሬ ኣይሲዛይቲ
ሱሬ ዋጋ ከሴቴስ።
- 16 ዳናቲ ታኒ ማዲን
ዴራ ኣይሴቴስ፤
ዴራ ሃሪዛ ጊታ ኣሳቲ
ኡባይ ሃሪቴስ።
- 17 ታና ሲቁዛይታ ታኒ ሲቃይስ፤
ሚኒ ኮይዛይቲ ታና ዴማና።
- 18 ዴሬቴሴኔ ቦንቾይ
ታ ማታን ዴቴስ፤
ዉሮንታ ኣቆታይኔ
ኢንጃይ ታ ማታና።
- 19 ኢንቴ ታፔ ዴሚዛ ጎኣይ
ሙሩታ ዋርቃፌ ኣጼስ፤
ታ ኢሞታይካ
ሴሪሲ ከሲዳ ቢራፔ ዳሬስ።
- 20 ታኒ ዲሎቴላ ኦጌን ሄሜታይስ፤
ሱሬ ፒርዳ ካላይስ።
- 21 ታና ሲቁዛይታስ
ታኒ ዴሬቴሴ ኢማና፤
ኢስታ ሚንጃ ኬላካ
ታኒ ኩንላና።
- 22 «ጎዳይ ታና ባ ኦሶ ኡባፌ
ኮይሮ ሜጲዴስ፤
ቤኒፔካ ኢዛ ኦሳስ
ኮይሮይ ታና።
- 23 ሳሎይኔ ሳኣይ
ሜጲታናፔ ካሴ
ቤኒ ሜርናሶፌ ታኒ ሹሜታዲስ።
- 24 ዋጋ ጊታ ኣባቲ ባይንዳ ዋዴ፥
ሃላ ፑልቶቲ ጲቃናፔ ካሴ
ታኒ ዬሌታዲስ።
- 25 ዙማቲኔ ዙሞቡላቲ
ሜጲታናፔ
ካሴ ታኒ ዬሌታዲስ።
- 26 ጎዳይ ሳኣኔ

- ሳኣ ቦላ ዲዛ ዴምባታ
 ዋይኮ አላሜ ቦላ ዲዛ ጉዲላታ
 ሜቆናፔ ካሴ ታኒ ዩሌታዲሰ።
 27 ጎዳይ ሳሎታ ሚጨዳ ዋዴኔ
 ጌታ አባታፔ ቦላራ
 ሳሎ ጉፋንሶ ገገሲዳ ዋዴ
 ታኒ ሄን ዴኣይሰ።
 28 ጎዳይ ሻራታ ቦላን
 ዋሲዳ ዋዴ፥
 ጌታ አባ ፑልቶታ
 ቆሲዳ ዋዴ፥
 29 አባ ሃላቲ
 ባንታሰ አሜቲዳ ዛዋፔ
 ፒኒዲ አቆንታ ማላ
 ዛዋ ዋሲዳ ዋዴ፥
 ሳኣሰ ዮች ዩጊዳ ዋዴ፥
 30 ሄ ዋዴ ታኒ ኢዛ ማታን
 ዋና አሳንቻ፤
 ኡባ ጋላሰ ታኒ
 ኡፋይሳን ኩማይሰ፤
 ታኒካ ኢዛ ሲንሳን ኡፋዬታይሰ።
 31 ኢዛሰ ጊዲዳ አላሜ ኡባን
 ታ ኡፋዬታይሰ፤
 አሳ ናይታንካ ታ ኡፋዬታይሰ።
 32 «ሃኢካ ታ ናይቶ!
 ታኒ ጊዛይሳ ኤዘጊቴ፤
 ታ ኦጌ ናጊዛይቲ አንጃቲዳይታ።
 33 ታ ቲሚርቲ ሲዪቴ፤
 አቆ ኤራንቻታ ጊዲቴ፤
 ዉዳ ቆዮፒቴ።
 34 ታኒ ዮቲዛይሳ ሲዪዛ አሲ፥
 ሃች ሃች ታ ፔንጌን ቤቲዛ አሲ፥
 ታሶ ጌሊዛሶንካ
 ናጊዛ አሲ አንጃቲዳዴ።
 35 ታና ዴሚዳይ ዴኦ ዴሚሰ፤
 ጎዳፔ ኢዚ ሳባ ዴሚሰ።
 36 ጊዶ አቲን ታና

ዴሞንታ ኣጊዳ ኣሲ
ባና ቆሄሰ፤
ታና ኢጲዛ ኡባቲ
ሃይቆ ሲቄቲሰ» ጋዱሰ።

9

ኣጵ ኤራቴሲኔ ኤያቴላ

- 1 ኣጵ ኤራቴላያ
ባሰ ኩላ ኩጻዱሰ፤
ኩላሰ ላፑን
ቱሳታ ኤሳዱሰ።
- 2 ኢዛ ሞጵ ሜሄ ሹካዱሰ፤
ዎይኔ ኡሹ ኣጋዱሰ፤
ማዳካ ጊጊሳዱሰ።
- 3 ሂሰታዳ ኣሳ ጴይጋናሰ
ባ ማጫ ኣይሌታ ኪታዱሰ።
ኢዛ ካታማይፔ ጶቃ ሶን
ኤቃዳ ጴይጋዱሰ፤
- 4 «ኢንቴኖ! ኤራይ ፓጪዳይቶ
ሃ ጌሊቲ!» ጋዱሰ።
ኤያታካ ኢዛ፤
- 5 «ሃ ዪዲ ታ ቁማ ሚቲ፤
ታኒ ኣጊዳ
ዎይኔ ኡሻካ ኡጹቲ!
- 6 ኢንቴ ኤያቴላ ኦጌዛ ኣጊቲ፤
ኢንቴ ሼሞፖራ ፓጻ ዴኣና፤
ኣኬካ ኦጌን ሄሜቲቲ» ጋዱሰ።
- 7 ቂልጪዛ ኣሰ ሴሪዛ ኣሲ ኡባይ
ባሰ ጫሼ ካላና፤
ኢታ ኣሰ ዞሪዛዴይካ
ባሰ ካዉያና።
- 8 ቂልጪዛ ኣሰ ዞርፓ፤
ኔ ኢዛ ዞሪኮ ኢዚ ኔና ኢጻና።
ኣጵ ኤራንቻ ኣሰ ሴራ፤
ኔ ኢዛ ሴሪኮ ኢዚ ኔና ዶሳና።
- 9 ኣጵ ኤራንቻ ኣሰ ታማርሳ፤
ሂሰቲኮ ኢዚ ካሴይሳፊካ
ኣጵ ኤራንቻ ጊዳና።

ጸሎ አስ ታማርሳ፤
ሂስቲኮ ኢዚ ኤራቴሰ ጉጃና።

- 10 አጽ ኤራቴሳስ ኮይሮይ
ጎዳስ ያሻቴላ፤
ጌሻዛ ኤሮይካ አኬካ።
- 11 ታ ጋሶን ኔስ ባሬይ አዲቃና፤
ኔስ ዴኦ ላይላይካ ጉጃታና።
- 12 ኔኒ አጽ ኤራንቻ ጊዲኮ
ጎኤታና፤
ኔ ቂልጨዛዴ ጊዲኮ ቆሄታና።
- 13 ኤያ ማጫሲ ዋጫማ ዳራዉስ፤
ኢዛ ባና ሃሩኩ፤
ኢዛ አይኮካ ኤሩኩ።
- 14 ኢዛ ባ ካሬን ኡታ ፔአዉስ፤
ካታማ ጊደን ቶቃሶ
ኬዛ ኡታዉስ።
- 15 ሄራ አጲ
ባ ኦጌ ቢዛይታ ጸይጋዉስ።
- 16 ኢዛካ ዋዚና ፓጨታስ፤
«ኢንቴኖ! አኬካይ ፓጨዳይቶ
ታኮ ሃ ጸቴ።
- 17 ካይሲ ኡዪዛ ሃሊ ማልኤስ፤
ጌማን ሚዛ ቆማይካ
ሱኬሴስ» ጋዉስ።
- 18 ጊደ አቲን ሃይቂዳ አሳይ
ሄን ዴኢዛይሳ፤
ኢዚ ኢማላቲካ ዱፎ ጊደን
ዲዛይሳ ኢስቲ ኤሬቴና።

10

ሶሎሞኔ ሌሚሶታ

- 1 ሃይቲ ሶሎሞኔ ሌሚሶታ።
አጽ ኤራቴሊ ዲዛ ናይ
ባ አዋ ኡፋይሴስ፤

- ጌዶ ኣቲን ኤያ ናይ
ባ ኣዮ ጨጨሰሰ።
- 2 ቤሶንታ ኦጌራ ዪዳ
ኣቆታይ ጎኤና፤
ጌዶ ኣቲን ጸሎቴሉ
ሃይቆፔ ኣሸሰ።
- 3 ጎዳይ ጸሎታ ጋፊሰና፤
ጌዶ ኣቲን ናጋራንቻታ
ኣሞ ጨልቃሚሳና።
- 4 ኣዛላቴሉ ማንቂሰሰ፤
ሚኒ ኦሶይ ጌዲኮ ዱሬሰሰ።
- 5 ኣጵ ኤራንቻይ
ካል ዋዴራ ሺሺሰ፤
ካል ሺሺዛ ዋዴ ጳሰኪዛ
ኣሲ ጌዲኮ ካዉዬሰ።
- 6 ጸሎ ኣሲ ኣንጄቴሰ፤
ኢታ ኣሳ ዶና
ማካላቴሉ ጎርዴሰ።
- 7 ጸሎታ ሱንላይ
ኣንጆን ጸይጌቲሺ ዳና፤
ኢታታ ሱንሉ ጌዲኮ ዶጌታና።
- 8 ኣጵ ኤራንቻይ
ኣዛዙ ኤሮ ጌ ኤኬሰ፤
ሎምኡሎምኢዛ ኤያቲ ጌዲኮ
ባሻሶ ቤቴሰ።
- 9 ሱሬ ኣሲ ሂርጋይ ባይንዳ ዴሰ፤
ጌላ ኦጌ ቢዛ ኣሲ ጌዲኮ
ባ ሞሮን ኦይኬታና።
- 10 ጌኔ ኦሶሰ ቂምኦቲዛ ኣሲ
ሜቶ ኤሂሰ፤
ሎምኡሎምኢዛ ኤያይካ
ሜቶ ኤሂሰ።
- 11 ጸሎታ ሃሳያይ ዴኦ ፑልቶ፤
ኢታታ ሃሳያይ
ማካላቴሉ ጌንሉሰ።
- 12 ኢጶይ ፓላማ ዴንሌሉሰ፤
ሲቆይ ጌዲኮ

- ባላ ኡባ ካሚ አደሰ።
- 13 ዋዚናማ አሳይ
አዶ ኤራን ሃሳዬሰ፤
ኤያ ዘኮን ጊዲኮ
ጸሞአይ ሜቄሰ።
- 14 አዶ ኤራንቻቲ
ኤራቴላ ዳጋሴቴሰ፤
ኤያ ሃሳያይ ጊዲኮ
ባሽ ጸይጌሰ።
- 15 ዱሬታ አቆታይ ኢሰታሰ
ገምቤቲዳ ካታማ፤
ማንቆታ ማንቆቴላ
ኢሰታሰ ጳዮሶ።
- 16 ጸሎ አሳ ዳሞዛይ ዴኦ፤
ኢታ አሳታሰ
ዋደይ ጊዲኮ ቂጻቴ።
- 17 ሴራ ኤኪዛ አሲ
ዴኦ ኦቴን ሄሜቴሰ፤
ሴራ ኢጸዛ አሲ ጊዲኮ
ሜቶ ቦላ ዋደሰ።
- 18 ኢዲሼ ባ ኢዲዛይሳ
ቆቴዛ አሲ ዋርዳንቻ፤
ዘጊርሰ ዘጊርዛ
አሲ ጊዲኮ ኤያ።
- 19 ዳር ሃሳያ ገደን
ሞርይ ጳዬና፤
ባ ደና ሺሺ ኤኪዛ
አሲ ጊዲኮ
አዶ ኤራንቻ።
- 20 ጸሎታ ሃሳያቲ
ጌሻ ቢራ ማላ፤
ኢታ አሳ ቆፋሰ ጊዲኮ
ጎአይ ዴና።
- 21 ጸሎታ ሃሳያይ ዳርታ ጎኤሰ፤
ኤያቲ ጊዲኮ
ባ ዋዚና ፓጩን ሃይቄቴሰ።
- 22 ጎዳ አንጆይ ዱሬ ኬሴሰ፤

- ኢዚ ሄ ዱሬቴላን
 ማቶ ጉጂና።
- 23 ኤያ ኣሲ ኢታ ኦሶን ኡፋዬቴሰ፤
 ዋዚናማ ኣሲ ጊዲኮ
 ኣጵ ኤራቴላን ኡፋዬቴሰ።
- 24 ኢታ ኣሰ ሂርጊዛ ሚሽ
 ኢዛ ቦላ ጋካና፤
 ጊዶ ኣቲን ጸሎ ኣሞይ
 ኢዛሰ ፖሌታና።
- 25 ጎቴ ጫርኮይ ዳንዲሺን
 ኢታቲ ፒቴቲ ጳያና፤
 ጸሎቲ ጊዲኮ
 ሜርናሰ ሚኒ ዳና።
- 26 ጫላይ ኣቶ ዚልኢሲዛ ማላኔ
 ጩዋይ ኣይፌ ቆሂዛ ማላ
 ኣዛላ ኣሲ ከቲዳዳንታሰ
 ሄሳ ማላ።
- 27 ጎዳሰ ያሺ ላይሰ ኣዱሴሰ፤
 ኢታታ ባሬይ ጊዲኮ ቃንዳ።
- 28 ጸሎታ ሂዶታይ ኡፋይሳን ጋሌሰ፤
 ኢታታ ሂዶታይ ጊዲኮ
 ሃዳ ጊዲ ኣቴሰ።
- 29 ጎዳ ኦጌይ ጸሎታሰ
 ባቃቲ ኣቲዛሶሆ፤
 ኢታ ኦሊዛይታሰ ጊዲኮ ባሻ ሶሆ።
- 30 ጸሎቲ ሙሌካ ጵቃሌቴቴና፤
 ኢታቲ ጊዲኮ ቢታ ቦላ
 ዴኤቴና።
- 31 ጸሎታ ዶናይ
 ኣጵ ኤራቴላ ሃሳዬሰ፤
 ጌላታ ኢንጻርሲ ጊዲኮ ቃንጾታና።
- 32 ጸሎታ ሜቴርሻይ
 ቤሲዛ ዮኦ ሃሳዬሰ፤
 ኢታ ዶናይ ጊዲኮ
 ቦካ ዮቴሰ።

11

- 1 ጎዳይ ዋርዶ ጌዳራ ኢጾሰ፤
 ጊዶ ኣቲን ሱሬ

- ጌዳራን ኡፋዬቴሰ።
 2 ኦቶሮቴላ ካወሻቴላ ካሌሌሰ፤
 ኣሸከቴላ ጊዲኮ
 ኣቶ ኤራቴላ ኤሄሰ።
 3 ጸሎታ ኢሰታ ሱሬቴላ ካሌሌሰ፤
 ጊዶ ኣቲን ዋርዳንቻታ
 ኢሰታ ዋርዶቴላ ጳይሴሰ።
 4 ሃንቆ ጋላሰ ዱሬቴላ ጎኤና፤
 ጊዶ ኣቲን ጸሎቴላ
 ሃይቆቴ ኣሼሰ።
 5 ቦሬይ ባይንዳ ኣሳታ
 ኢሰታ ጸሎቴላ
 ኢሰታሰ ኦጌ ሱሪሴሰ፤
 ጊዶ ኣቲን ኢታቲ ባንታ
 ኢታቴላን ኩንዴቴሰ።
 6 ሱሬታ ኢሰታ ጸሎቴላ ኣሼሰ፤
 ጊዶ ኣቲን ማልቴቲ
 ባንታ ኢታ
 ኣሞን ኦይኬታና።
 7 ኢታ ኣሲ ሃይቂዛ ዋዴ
 ኢዛ ሂዶታይ
 ሃዳ ጊዴሰ፤
 ባ ዋልቃን ኢዚ ጨቄቴዛዚ
 ኡባይካ ጳዩሰ።
 8 ጸሎይ ሜቶቴ ኣቲሰ፤
 ጊዶ ኣቲን ሜቶይ
 ኢታ ኣሳ ቦላ ጋኬሰ።
 9 ኢታ ኣሲ ባ ዶናን
 ባ ላጌዛ ጳይሴሰ፤
 ጊዶ ኣቲን ጸሎቴ ኤራቴላን
 ኬሲ ኤኪ ኣቲቴሰ።
 10 ጸሎታሰ ኢንጃቴዛ ዋዴ
 ካታማይ ኡፋዬቴሰ፤
 ቃሴ ኢታቲ ጳይዛ ዋዴ
 ሃሹ ጌሰ።
 11 ሱሬታ ኣንጃ ጋሶን
 ካታማይ ዲጨሰ፤
 ኢታ ሃሳያን ጊዲኮ
 ካታማይ ጳዩሰ።

- 12 ዋዚና ፓጩ ኣሲ
 ባ ሾርዛ ካጵሰ፤
 ኣከካንቻ ኣሲ ጊዲኮ
 ባ ዶና ሺሺ ኤከሰ።
- 13 ዚገርዛ ኣሲ ጹራ ላሌሰ፤
 ኣማኔቲዛ ኣሲ ጊዲኮ ጹራ ናጌሰ።
- 14 ካሌሶ ፓጩን
 ካዋቴሊ ኩንዳሰ፤
 ዳሮ ዘራንቻቲ ዴኢኮ
 ሳሮይ ዴሰ።
- 15 ኤሮንታ ኣሳሰ ዋሴቲዛይ
 ማቶን ጌሊሰ፤
 ዋሴ ጌላናሰ ጫቆንታዴ
 ኣይኮይካ ቦቹና።
- 16 ኡሎ ኪያ ማጫሳያ
 ቦንቹታዉሰ፤
 ዋልቃሊዛ ኣሳቲ
 ዱሬቴሰ ጸላ ዱሬቴቴሰ።
- 17 ኪያ ኣሲ ባና ጎኤሰ፤
 ማንጾ ኢታ ኣሲ ጊዲኮ
 ባ ቦላ ሜቶ ኤሄሰ።
- 18 ኢታ ኣሲ ዴሚዛ ዋጼይ ዴና፤
 ጸሎቴሰ ዜሪዛ ኣሲ ጊዲኮ
 ሱሬ ዋይቶ ኤካና።
- 19 ጸሎይ ዴኦ ዴማና፤
 ጊዶ ኣቲን ኢታቴሰ
 ካሊዛ ኣሲ ሃይቃና።
- 20 ጎዳይ ኢታ ቆፋይ
 ዴኢዛ ኣሳታ ሻቴቴሰ፤
 ጊዶ ኣቲን ሱሬ
 ሄማቲዛይታን ኡፋዬቴሰ።
- 21 ኢታ ኣሲ ቃጻዬቶንታ ኣቴና፤
 ጊዶ ኣቲን ጸሎቴ
 ቃጻዬቴቴና።
- 22 ኣከካይ ፓጪዳ
 ማጫሳ ፑላቴሊ
 ጉዱንላ ሰዴን
 ኣሊዳ ዋርቃ ማላ።
- 23 ጸሎታ ኣዋሰ ዉርሴሊ ሎኦ ጸላ፤

- ጌዶ አቲን ኢታታ አሞሰ
ወርሴላ ሃንቆ ጸላ።
- 24 ኢሲ ኢሲ አሳቲ
ጮ ኪያቴላ ኢሜቴሰ፤
ጌዶ አቲን ኢሰታሰ አቆይ
ሃ ሃ ዳሬሰ።
ባጋቲ ከሂ ኡዜቴቴሰ፤
ጌዶ አቲን ኢሰቲ
ማንቂ ማንቂ ቤቴሰ።
- 25 ኪያ አሲ ዱሬታና፤
ሃራታሰ ኢሚዛይ
ባሰ ዋፓ ዴሜሰ።
- 26 ጌማራ ካሐ ዳጋሲዛዴ
ዴሬይ ቃንጌሰ፤
ኬሲ ባይዚዛዴይ ጌዲኮ
አንጃቴሰ።
- 27 ሎኦ ሚሽ ሚንላ ኮይዛዴ
ሎኦ ሚሺ ናጌሰ፤
ጌዶ አቲን ኢታ ሚሽ ኮይዛዴ
ኢታ ሚሺ ጋኬሰ።
- 28 ባ ዱሬቴላን
አማኔቲዛ አሲ ኩንዳና፤
ጸሎቲ ጌዲኮ
ሎኦ ሚላ ማላ ጪሊላና።
- 29 ሶ አሳ ቦላ ሺሮ ዴንላዛ
አሲ ጎአይ ባይንዳ አታና፤
ኤያቲካ አቶ ኤራንቻታሰ
አይሌ ጌዳና።
- 30 ጸሎ አሲ ዴኦ አይፌ
አይፊዛ ሚላ ማላ፤
ሼሞፖታ አሺዛይ
አቶ ኤራንቻ።
- 31 ጸሎቲ ሳኣን
ባንታ ኦሶ ዋጋ
ኤኪዛ ጌዲኮ፤
ኢታቲኔ ናጋራንቻቲ
ባንታ ኦሶሰ ኤካና ዋጋይ

ዋኒ ዳራንዴሻ!

12

- 1 ሴራ ደሲዛ እሲ ኤራቴላ ደሴስ፤
ጊዶ እቲን ሴራ ኢዲዛ
እሲ ዳማ።
- 2 ሎኦ እሲ ጎዳፔ ሳባ ዴማስ፤
ጊዶ እቲን ጎዳይ
ጌናንቻታ ፒርዴስ።
- 3 እሲ ኢታቴላን ኤቁዲ
ሚኒ ካንፋናዉ ዳንዳዬና፤
ዲሎቲ ጊዲኮ
ባ ዲዛሶፔ ቃጾቴና።
- 4 ዋዚናማ ማጫሳያ
ባ ኬላዋስ
ካላቻ ማላ፤
ዬላቺዛ ማቻ
ባ ኣዚናስ
ሜቁላ ጋርሳን ዲዛ
ዋይዛዚሬ ሃርጌ ማላ።
- 5 ዲሎታ ቆፋይ ሱሬ፤
ኢታታ ዞሬይ ጊዲኮ ጨሞ።
- 6 ኢታታ ሃሳያይ እስ ዋጄስ፤
ዲሎታ ሃሳያይ ጊዲኮ
እስ ኣሼስ።
- 7 ኢታ ኣሳቲ ኩንዳና፤
ኢስታስ ዜሬሊካ ኣቴና፤
ዲሎታ ዜሬሊ ጊዲኮ
ሚኒ ዳና።
- 8 እሲ ባ ኣጵ ኤራቴላ ማላ
ጋላቴቴስ፤
ጊዶ እቲን ጌላ ቆፋይ
ዴኢዛ እሲ ካጄቴስ።
- 9 ኣይኮይ ባይንዳ ዲሺን
ዲሬ ኣሳ ማላ ጨቄቴዛ ኣሳፔ
ባና ዚቁ ሂስቲ
ባስ ኦሊ ኣቂዛ እሲ ኪያ።

- 10 ጸሎ አሲ ባ ሚሄስ ቃጼቴሰ፤
ኢታ አሲ ኪያቴሰ ጊኮካ
ሚንጾ ኢታ።
- 11 ባ ቢታ ሚንሉ ኦሊዛ አሲ
ካል ካሌሰ፤
አኬካይ ፓፌዳ አሲ
ኅኣይ ባይንዳ ሂዶታ ኅዴሰ።
- 12 ናጋራንቻቲ ኢታቲ
ዲኢ ኤሂዳይሳ አሞቴቴሰ፤
ጸሎታ ዜሬሉ ጊዲኮ ዳያና።
- 13 ኢታ አሲ ባ ሃሳይዳ
ኢታ ሃሳያን ኦይኬቴሰ፤
ጸሎይ ጊዲኮ ሜቶፔ
ኬሲ ኤኪ አቴሰ።
- 14 አሲ ባ ደናፔ ኬኢዛ ቃላን
ሎኦ ሚሽ ካሌሰ፤
ባ ኦሊዳ ኦሶ
ዋጋካ ዴሜሰ።
- 15 ኤያ አሳሰ ኢዚ ቢዛ ኦጌይ
ኢዛሰ ሎኦ ሚሳቴሰ፤
አጼ ኤራንቻይ ዞሬ ሲዬሰ።
- 16 ኤያ አሳ ሃንቆይ ሄራካ ኤሬቴሰ፤
ጨንጫ አሲ ጊዲኮ
ጨሼ ወዱ ጌና።
- 17 ሱሬ ማርካይ ቱማ ማርካቴሰ፤
ዋርዶይ ጊዲኮ
ዋርዶ ማርካቴሰ።
- 18 አኬኮንታ ሃሳይዛ ሃሳያይ
ቶራ ማላ ጨዴሰ፤
አጼ ኤራንቻ
ኢንጻርሲ ጊዲኮ ፓሉሰ።
- 19 ዋርዶ ሃሳያይ ጉላ ዋዴሳ፤
ቱማ ሃሳያይ ጊዲኮ
ሚርናሳ።
- 20 ኢታ ቆፒዛይታ ዋዚናን
ባሌላይ ዴሰ፤
ጊዶ አቲን ሳር ሚሽ ቆፒዛይታ
ዋዚናን ኡፋይሲ ዴሰ።
- 21 ጸሎታ ቆሆይ ጋኬና፤

- ኢታቲ ጊዲኮ ሜቶ ካላና።
 22 ጎዳይ ዋርዶ ሃሳያ ሃራሴቴሰ፤
 ቱማንቻታን ጊዲኮ
 ኡፋዬቴሰ።
 23 አከካራ ዲዛ አሲ
 ባ ኤራቴሰ ቆቴሰ፤
 ዋዚናይ ባይንዳ አሲ
 ባ ኤያቴሰ ናሼሰ።
 24 ሚኒ ኦሊዛ አሲ ዴሬ ሃሬሰ፤
 አዛላይ አይሌ ጊዴሰ።
 25 ሂርጋን ኩሚዳ ዋዚናይ
 አሰ ጨጨን ዩጌሰ፤
 ሾንጋራ ዲዛ ሃሳያይ ጊዲኮ
 ኡፋይሴሰ።
 26 ጸሎ አሲ ባ ላጌ
 ሎኦ ዘሬ ዘሬሰ፤
 ኢታታ ዘሬይ ጊዲኮ
 ቱማ ኦጌፔ ሃሴሰ።
 27 አዛላ አሲ ሻንካቲዲ
 ኤሂዳ አሾዛ ጸጾና፤
 ሚኒ ኦሊዛ አሲ ጊዲኮ
 ባ አቆታሰ ሚሼቴሰ።
 28 ጸሎቴሰ ኦጌን ዴኦይ ዴሰ፤
 ሄ ኦጌን ሃይቆይ ዴና።

13

- 1 ኤራ ናይ ባ አዋ ዘሬ
 ዋዚናፔ ሲዬሰ፤
 ቂልጪዛይ ጊዲኮ ሴራ ሲዬና።
 2 አሲ ባ ዶናፔ ከኢዛ ቃላን
 ሎኦ ሚሽ ዴሜሰ፤
 አማኔቶንታይቲ ጊዲኮ
 ማካላቴሰ አሞቴቴሰ።
 3 ባ ዶና ናጊዛ አሲ
 ባ ሼምፖ ናጌሰ፤
 ዶናን ዪዳ ማላ ሃሳይዛ አሲ
 ባና ቋይሴሰ።
 4 አዛላይ ከሂ አሞቴሰ ሺን

- አይኮካ ዳሚና፤
 ሚኒ ኦሊዛይታ
 አሞይ ጊዲኮ ኩማና።
- 5 ዲሎ አሳቲ ዋርዶ ሃሳያ ኢጾቴስ፤
 ኢታ አሳታ ሃሳያይ ጊዲኮ
 ዩላሴሲኔ ካዉሼስ።
- 6 ዲሎቴሊ ሱሬ አሰ ናጌስ፤
 ኢታቴሊ ጊዲኮ
 ናጋራንቻ ቆይሴስ።
- 7 አይኮይ ባይንዳ
 ባና ዱሬ ሚሳቲሲዛ አሲ ዳስ፤
 ሃራ ባጋራ ባስ
 ዳሮ አቆታይ ዲሺን
 ማንቆ ሚሳቲ ቤቲዛ አሲ ዳስ።
- 8 አሲ ባ ዱሬቴላን
 ባ ሸምፖ ዋዛና ጊዳና፤
 ማንቆይ ጊዲኮ
 ሂርጋይ ባይንዳ ኡቴስ።
- 9 ዲሎታ ፖኦይ ኬሂ ፖኤስ፤
 ኢታታ ጸምፔይ ጊዲኮ ቶኣና።
- 10 ኦቶሮይ ኦሽ ዩሌስ፤
 አቶ ኤራቴሊ ጊዲኮ
 ዞሬ ኤኪዛይታ ማታን ዳስ።
- 11 ቤሶንታ ኦጌራ ዳሚዳ ሚሺ
 ቆዩ ቆዩ ቤስ፤
 ባ ጫዋ ጉሲዲ ዳሚዳ አቆታይ
 ዳሪ ዳሪ ቤስ።
- 12 ሂዶታይ ፖሌቶንታ ጋምኢኮ
 ዋዚናይ ሜቄስ፤
 ጊዶ አቲን አሞቲዳይሲ
 ፖሌቲሺን ኡፋይሴስ።
- 13 ዞሬ ካጲዛ አሲ ሜቶን ጌሌስ፤
 አዛዞ ሶንቺዛ አሲ ጊዲኮ
 ባ ዋጋ ኤካና።
- 14 አቶ ኤራንቻይ ኢሚዛ ቲሚርቴይ
 ዴኦ ፑልቶ፤
 ሄሲ አሲ ሃይቆ ዋዲማዳን
 ጌሎንታ ማላ ናጌስ።

- 15 አኩካይ ዳኢዛ አሲ ቦንቹቴሰ፤
 አማኔቶንታ አጎይ
 ባሻ ኦጌ ኤፌሰ።
- 16 አኩኪዛ አሲ ኤራን ኦፊሰ፤
 ኤያይ ጊዲኮ
 ባ ኤያቴላ ቆንጨሴሰ።
- 17 ኢታ አሲ ኪቴቴኮ ሜቶን ጌሌሰ፤
 አማኔቲዳ አሲ ኪቴቴኮ
 ሳሮቴላ ኤሄሰ።
- 18 ሴራ ኢዲዛ አሲ
 ማንቄሰኔ ካዉዬሰ፤
 ሃንቆ ሲዱዛ አሲ ጊዲኮ
 ቦንቹቴሰ።
- 19 አሞይ ፖሌቴኮ ኮሂ ኡፋይሴሰ፤
 ኤያቴ ጊዲኮ
 ኢታፔ ሃካናሰ ኮዬቴና።
- 20 አጾ ኤራንቻታራ ሄሜቲዛ አሲ
 አጾ ኤራንቻ ጊዳሰ፤
 ጊዶ አቲን ኤያታራ ሄሜቲዛ አሲ
 ሜቶን ጌሌሰ።
- 21 ናጋራንቻታ
 ኢታ ቃዳይ ካሌሰ፤
 ዲሬቴላ ጊዲኮ
 ጸሎታሰ ኢሜቲዛ ዎይቶ።
- 22 ሎኦ አሲ ባሰ
 ና ናይታ ጋካናሰ ላቲሴሰ፤
 ናጋራንቻ አቆታይ ጊዲኮ
 ጸሎታሰ ዳጋቴሰ።
- 23 ማንቆ ጋዳይ
 ዳሮ ካላ ኢማና ዳንዳዬሰ፤
 ጊዶ አቲን ሱሬ ፒርዳይ ቆይኮ
 ፒቴቲ ቆዬሰ።
- 24 ሴሮንታ ዲቺዛይ ባ ና ኢጾሰ፤
 ጊዶ አቲን ሴሪ ዲቺዛይ
 ባ ና ደሴሰ።
- 25 ጸሎይ ካላናሼ ጋካናሰ ሜሰ፤
 ኢታቴ ጊዲኮ ጋፊዳ ማላ ዳና።

14

- 1 አጽ ኤራቴሌ ዲዛ ማጫሳያ
ባ ኬል ኬጻወሰ፤
ኤያያ ጊዲኮ ባ ኬል
ባ ኩሼን ላላወሰ።
- 2 ሱሬ ሂሜቲዛ እሲ
ጎዳሰ ያዬሰ፤
ጌላ ኦጌ ሂሜቲዛይ ጊዲኮ
ኢዛ ካጄሰ።
- 3 ኤያ ሃሳያይ ኢዛ ዘኮሰ
ጋቱማ ኤሂሰ፤
አጽ ኤራንቻታ
ኢንጻርሳይ ጊዲኮ
ኢሰታ ናጌሰ።
- 4 ቦራይ ባይንዳሶን
ጎታራይ ሜላ ዳሰ፤
ጊዶ እቲን ኔሰ ቦራታ ዋልቃን
ዳሮ ካሊ ቤቴሰ።
- 5 አማኔቲዛ ማርካይ ኡባቶ
ቱማ ማርካቴሰ፤
ዋርዶ ማርካይ ጊዲኮ
ዋርዶ ማርካቴሰ።
- 6 ቂልጪዛይ አጽ ኤራቴል
ኮይኮካ ዴሚና፤
አኬካይ ዲዛ እሲ ዋዬቶንታ
ኤራቴል ዴሚሰ።
- 7 ኤያ አሳፔ ሃካ፤
አይሰ ጊኮ ኔኒ ኢዛ ሃሳያፔ
ኤራቴል ዴማካ።
- 8 አኬካንቻ አሳሰ
አጽ ኤራቴሌ
ባ ኦጌ ናጎ፤
ኤያታ ኤያቴሌ ጊዲኮ
ኢሰታ ጪሜሰ።
- 9 ኤያቲ ናጋራ ኦሊዲ
ዋጄታናይሳ አጊዲ
ቂልጪቴሰ፤
ሱሬ አሳታፔ ጊዲኮ
ሎኦ ቆፋይ ቤቴሰ።

- 10 ኢሶይ ኢሶይ
 ባ ዋዚናን ዲዛ
 ጩጩ ኤሬሰ፤
 ኢዛ ኡፋይሳ ኦኒካ ኢዛራ ኮጾና።
- 11 ኢታታ ከላይ ላሌታና፤
 ሱሬታ ከላይ ጊዲኮ
 ሚኒ ዴኣና።
- 12 ኣሳሰ ሊኬ ሚሳቲዛ ኦጌይ ዴሰ፤
 ወርሴላን ጊዲኮ
 ሃይቆሰ ጋሌሰ።
- 13 ሚቻንካ ዋዚናይ
 ሜቂ ኤሬሰ፤
 ሙዞቴላን ኡፋይሲ
 ፖሌታና ዳንዳዬሰ።
- 14 ባ ዋዚና ጸሎቴላፌ ሃሲዛይቲ
 ባ ኦሶ ዋጋ ኤካና፤
 ሎኦ ኣሲካ ባ ሎኦ ኦሶ
 ዋጋ ኤካና።
- 15 ኤያ ኣሲ ኡባ ሚሽ ኣማኔሰ፤
 ጨንጫይ ጊዲኮ
 ኣኬኪዲ ታንጌሰ።
- 16 ኣጶ ኤራንቻይ
 ጎዳሰ ያዬሲኔ
 ሳቲ ታንጌሰ፤
 ኢታፔካ ሃኬሰ፤
 ኤያይ ጊዲኮ
 ወዳይ ባይንዳ ቢቻሬሰ።
- 17 ኤሌ ሃንቁቲዛ ኣሲ
 ኤያ ኦሶ ኦሌሰ፤
 ዮኦ ቃቺዛ ኣሲ ደሴቴና።
- 18 ዋዚና ፓጩቲ ኤያቴላ ላታና፤
 ኣኬካንቻቲ ጊዲኮ
 ኤራቴላ ካላቻ ማላ ጎጻና።
- 19 ኢታቲ ሎኦታ ሲንላን ጉልባታና፤
 ናጋራንቻቲ
 ጸሎታ ፔንጌን ሆካና።
- 20 ማንቆታ ኢሰታ ላጌቲካ ኢጾቴሰ፤

- ዲሬታሰ ጊዲኮ
ዳሮ ላጌቲ ዳቴሰ።
- 21 ባ ሾሮ ካጲዛ ኣሲ
ናጋራ ኣሴሰ፤
ጊደ ኣቲን ማንቆ ማዲዛይ
ኣንጃቲዳይሳ።
- 22 ኢታ ሃልቺዛይቲ
ሱሬ ኦጌፕ
ካሬ ኬዜቲሰ ዳቴኔ?
ሎኦ ቆፒዛይቲ ጊዲኮ
ሲቆኔ ኣማኔቴላ ኤሄቴሰ።
- 23 ሚኒ ኦሶን ኡባን ዋጼይ ዳሰ፤
ሃዳ ዮኦይ ጊዲኮ ማንቂሰሰ።
- 24 ኣጵ ኤራንቻታሰ
ኢሰታ ዲሬቴላ ኢሰታሰ ካላቻ፤
ኤያታ ኤያቴላ ጊዲኮ
ጮ ሃዳ።
- 25 ቱሙ ማርካይ ሾሞፖ ኣሼሰ፤
ዋርዶ ማርካይ ጊዲኮ ባሌሴሰ።
- 26 ጎዳሰ ያጼዛ ኣሳሰ
ሚኖ ሚጻይ ዳሰ፤
ኢዛ ናይታሰካ
ባቃቲ ኣቲዛ ሶሆይ ዳሰ።
- 27 ጎዳሰ ያሺ ዳኦ ፑልቶ፤
ሃይቆ ዋጺማዴፔ ኣሰ ኣሼሰ።
- 28 ዳሬ ጮራቴላይ ካዎሰ ቦንቾ፤
ዳሬ ጉላቴላ
ካዎሰ ባሽ ጊዳሰ።
- 29 ዳንዳያንቻ ኣሳሰ
ጌታ ኣኬካይ ዳሰ፤
ኤሌ ሃንቄቲዛ ኣሲ ጊዲኮ
ባ ኤያቴላ ቆንጨሴሰ።
- 30 ዋፑ ጊዳ ዋዚናይ
ቦላሰ ፓያቴላ ኢሜሰ፤
ቃናቴይ ጊዲኮ
ሜቄላ ጊዶን ጌሊዳ
ዋይዛዚሬ ማላ።
- 31 ማንቆታ ናቂዛ ኣሲ

- ኢስታ ሜዲዳሳ ጫዬስ፤
 ሜቶታንቻታስ
 ቃዴቲዛ ጊዲኮ
 ጸሳ ቦንቼስ።
- 32 ኢታቲ ባንታ ኢታ ኦሶን ኩንዳና፤
 ጊዶ ኣቲን ጸሎቲ
 ሃይቆ ዋዴካ
 ባቃቲ ኣቲዛሶይ ዴስ።
- 33 ኣኬካንቻ ኣሳ ዋዚናን
 ኣቶ ኤራቴሉ ኩሚዴስ፤
 ጊዶ ኣቲን ኤያቲ
 ኣቶ ኤራቴላ ጊሻስ
 ኣይኮካ ኤሬቴና።
- 34 ጸሎቴሉ ካዋቴላ
 ቶቁ ቶቁ ኦፊስ፤
 ጊዶ ኣቲን ናጋራይ
 ኣይ ኣሲካ ካወሼስ።
- 35 ኣቶ ኤራቴሉ ዲዛ ኣይሌይ
 ካዋ ኡፋይሴስ፤
 ጊዶ ኣቲን ዬላቺዛ ኣይሌይ
 ባ ቦላ ሃንቆ ኤሄስ።

15

- 1 ሊቆ ዛርይ ሃንቆ ኢርጺሴስ፤
 ፖርዶሎ ቃላይ ጊዲኮ
 ሃንቆ ዴንፊፊስ።
- 2 ኣቶ ኤራንቻ ኢንጻርሳፊ
 ኤራቴሉ ፑልቴስ፤
 ጊዶ ኣቲን ዶጋታ ዶናፔ
 ኤያቴሉ ፑልቴስ።
- 3 ጎዳ ኣይፌቲ ኡባሶ ጸሌቴስ፤
 ኢታታኔ ሎኦታ ኡባ
 ሎኤሉ ቤኤቴስ።
- 4 ሾንጋይ ዴኢዛ ሎኦ ሃሳያይ
 ዴኦ ሚላ ማላ፤
 ጊዶ ኣቲን ባሌላ ሃሳያይ
 ኣያና ቆሂስ።
- 5 ኤያይ ባ ኣዋ ሴራ ካዴስ፤

- ገደ አቲን ዘሬ ኤኪዛይ
ባ ኣኬካቴላ ቆንጨሴስ።
- 6 ዲሎ ኣሳ ኬላን
ዳሮ ኣቆታይ ዴስ፤
ገደ አቲን ኢታታሰ
ጌሊዛ ሚሺ ሜቶ ኤሄስ።
- 7 ኣቶ ኤራንቻታ ደናይ
ኤራቴላ ዜሬስ፤
ኤያታ ዋዚናይ ገዲኮ
ሄሳ ማላ ዴና።
- 8 ጎዳይ ኢታታ ያርሾ ሻቴቴስ፤
ሱሬታ ዋሳይ ገዲኮ
ኢዛ ኡፋይሴስ።
- 9 ጎዳይ ኢታ ኣሳታ ኦጌ ሻቴቴስ፤
ገደ አቲን ዲሎቴላ
ካሊዛይታ ደሴስ።
- 10 ሱሬ ኦጌ ኣጊዲ ካሬ ኬኢዳዴ
ሃንቆይ ናጌስ፤
ሴራ ኢዲዛ ኣሲ ሃይቄስ።
- 11 ዲፎኒኔ ቆሮ ገደን ዲዛይሲ
ጎዳ ሲንላን ቆንጨ፤
ሂስቲን ኣሳ ዋዚና ቆፋይ
ዋኒ ኢዛፔ ጌማኔ?
- 12 ቂልጨዛ ኣሲ ሴራ ደሴና፤
ኣቶ ኤራንቻታፔካ
ዘሬ ኦይቹና።
- 13 ዋዚና ኡፋይሲ ሲንላ ፖኢሴስ፤
ዋዚና ጨጨይ ገዲኮ
ኣያና ቆሂስ።
- 14 ኣኬኪዛ ዋዚናይ ኤራቴላ ኮዬስ፤
ገደ አቲን ደጋታ ደናይ
ኤያቴላ ባንቺኬስ።
- 15 ማንቆታ ዴኦይ
ኡባ ጋላሲካ ባጼ።
ኡፋይቴዛ ኣሳቲ ኡባቶካ
ባንታ ዴኦን ኡፋይቴቴስ
- 16 ኦሺ ዲዛሶን ዲዛ ገታ ኣቆታፔ
ጎዳ ያሻቴላራ ዲዛ

ጉላ አቆታይ አይደለም።

- 17 እሺ ዲዛሶን
ሞጽ እሾ ማናፔ
ሲቆይ ዲዛሶን
ሳንሰ ሙሲ አይደለም።
- 18 ኤሶን ሃንቄቲዛ አሲ ኦሽ ኬሴሰ፤
ዳንዳይዛ አሲ ጊዲኮ
ኦሽ ኢርጺሴሰ።
- 19 አዛላ አሳ ኦጌይ
አጉንላን ዲሬቲ ኡቲዳሰ፤
ሱሬ አሳ ኦጌይ ጊዲኮ
ባሳ ጊዳሰ።
- 20 አዶ ኤራራ ዲዛ ናይ
ባ አዋ ኡፋይሴሰ፤
ጊዶ አቲን ኤያ ናይ
ባ አዮ ካይደሰ።
- 21 ዋዚና ፓጩ አሲ
ባ ኤያቲላን ኡፋይቲሰ፤
ጊዶ አቲን አኬኪ
ሱሬ ኦጌ ካሌሰ።
- 22 ዞሬይ ጳይኮ
ሃልቾይ ኦጌን አቲሰ፤
ዳር ዞራንቻቲ ዲዛሶን
ሃልቾይ ፖሌቲሰ።
- 23 አሲ ቤሲዛ ዛር ኢሚዲ
ኡፋይሰ ዳሚሰ፤
ኮሺዛ ዋዴን ኢሜቲዳ ቃላይ
አይ ማላ ሎኦ!
- 24 ዱጌ ዱፎን ዋሊዛ
ኦጌ ቦንታ ማላ
ዴኦ ኦጌይ አዶ ኤራንቻ
ፑዴ ካሌላወሰ።
- 25 ጎዲይ ኦቶራንቻታ
ኬላ ላሌሰ፤
ጊዶ አቲን አሞኤይ ዛዋ ናጌሰ።
- 26 ጎዲይ ኢታታ ቆፋ ሻቲቲሰ፤
ጌሻታ ቆፋይ ጊዲኮ
ኢዛ ኡፋይሴሰ።

- 27 ኡዜ አሲ ባሶ አሳ ቦላ
 ማቶ ኤሄስ፤
 ጌዶ አቲን ማታኤ ኢጲዛ አሲ
 ፓጸ ዳና።
- 28 ጲሎ አሲ ሃሳያናፔ
 ካሴቲዲ ቆፔስ፤
 ጌዶ አቲን ኢታ አሳ ዶናፔ
 ኢታ ቃላይ ጎጌስ።
- 29 ጎዳይ ኢታታፔ ሃኮን ዴስ፤
 ጌዶ አቲን ጲሎታ ዋሳ ሲዬስ።
- 30 ፓሽካ ሃናይ ዋዚና ኡፋይሴስ፤
 ሚሺራቾ ቃላይ
 ማቄል ጨሊሊሴስ።
- 31 ዴኦ ኢሚዛ ሴራ ኤኪዛ አሲ
 አቆ ኤራንቻታራ
 ኢሲፌ ዳና።
- 32 ሴራ ኢጲዛ አሲ ባና ካዴስ፤
 ሴራ ኤኪዛ አሲ ጌዲኮ
 አኬካ ዴማስ።
- 33 ጎዳስ ያሽ
 አቆ ኤራቴል ታማርሴስ፤
 ቦንቹታና ኮዪዳ አሲ
 ኮይሮ ባና
 ካዉሻናስ ኮሼስ።

16

- 1 አሲ ባ ዋዚናን ሃልቹስ፤
 ጌዶ አቲን ዛሮይ
 ጎዳፔ ቤቲስ።
- 2 አሲ ቢዛ ኦጌ ኡባይ
 ኢዛስ ሎኦ ሚሳቲስ፤
 ጎዳይ ኮይሮ ዴንፋ ቆፋ
 ጫዲ ዴሌስ።
- 3 ኔ ኦሊዛ ኡባ ሃዳራ
 ጎዳስ ኢማ፤
 ሂስቲኮ ኔ ሃልቾይ ፖሌታና።
- 4 ጎዳይ ኡባ ሚሽ
 ሜዲዳ ጋሶይካ ዴስ፤

- ማካላንቻታ ጌዲኮካ
 ባሻ ጋላሳሰ
 ገግሲ ዋሊደሰ።
- 5 ጎዳይ ኦቶሬቲዛ
 ኡባ ሻቴቴሰ፤
 ኢሰቲ ቃጸዬቶንታ ኣቴቴና።
- 6 ሲቆኒኔ ኣማኔቴላን
 ናጋራይ ኣቶ ጌቴቴሰ፤
 ጎዳሰ ያሻቴላን
 ኣሲ ኢታፔ ሃኬሰ።
- 7 ኣሳ ሄሚታይ
 ጎዳ ኡፋይሲዛዝ ጌዲኮ
 ኢዛ ሞርኬቲ
 ኢዛራ ሳሮ ዳና ማላ ኦፊሰ።
- 8 ጸሎቴላን ቤቲዛ
 ጉላ ሚሺ
 ዋርዶራ ዴሚዛ
 ዳሮ ዋጼፔ ኣጼሰ።
- 9 ኣሲ ባ ዋዚናን
 ባ ኦላና ሚሽ ሃልቹሰ፤
 ሃልቸዚ ጎዳይ ጌኮ
 ፖሌቴሰ።
- 10 ካዎ ሜቴርሻቲ
 ጸሳፌ ኤኪዳ ማታን
 ሃሳዬቴሰ፤
 ኢዛ ኢንጻርሲ
 ፒርዳ ጌላሳናሰ ቤሴና።
- 11 ሱሬ ጌዳራቲኔ
 ማካ ሚሻቲ ጎዳፔ፤
 ካራጸቲ ጌዶን ዲዛ ጌዳራቲ
 ኡባይ ኢዛ ኦሶታ።
- 12 ካዎቲ ኢታ ኦሶ ሃራሴቴቴሰ፤
 ኣይሰ ጌኮ ካዎቴላ ኣራታይ
 ጸሎቴላን ኤቄሰ።
- 13 ጸሎ ሃሳያን ካዎቲ ኡፋዬቴቴሰ፤
 ቱማ ሃሳይዛይታካ ዶሴቴሰ።
- 14 ካዎ ሃንቆይ
 ሃይቆ ኪታንቻ ማላ፤

- አጽ ኤራንቻይ ጊዲኮ
ሃንቆ ኢርጸሴሰ።
- 15 ካዎይ ፓሽኪ ገሽን ዳኦይ ዳሰ፤
ኢዛሰ ኪያቴላ
ኢራ ቶኪዳ ባጼሳ
ሻራ ማላ።
- 16 አጽ ኤራቴላ ዳዋይ
ዎርቃ ዳሚዛይሳፌ አጼሰ፤
አኬካ ዳዋይ
ቢራ ዳዋፔካ አጼሰ።
- 17 ሱሬታ ኦጌይ ኢታታፔ ሃኮን ዳሰ፤
ባ ሄሜታ ናጊዛ አሲ
ባ ሼዎፖ ናጌሰ።
- 18 ኦቶሮ ጌዶ ባሺ ካሌሰ፤
ሃላጫ ጌዶካ
ኩንዳላ ካሌሰ።
- 19 ኦቶራንቻታራ ዙፔቲዲ
ዲኢ ኤሂዳ ሚሽ
ሻኬቲ ኤካናፔ
ማንቆታራ ማንቄቴላን
ዲሲ ኪያ።
- 20 ዞሬ ኤኪዛ አሲ ዱሬቴሰ፤
ሳዳን አማኔቲዛ አሲ
አንጄቲዳዴ።
- 21 ዎዚናን አጽ ኤራንቻ ጊዲዳ
አሳቲ አኬካንቻ
ጌቴቴቴሰ፤
ሎኦ ቃላይ ኤራቴላ ጉጄሰ።
- 22 ባሰ ሚሽ ኦሊዳዴሰ
አኬካይ ዴኦ ፑልቶ፤
ዶጋታሰ ጊዲኮ
ኤያቴላ ሃንቆ ኤሂሰ።
- 23 አጽ ኤራንቻ ዎዚናይ
ኢዛ ዶና ካሌሴሰ፤
ኢዛ ማቴርሻቲካ
ኤራቴላ ጉጂ ጉጂ ቤቴሰ።
- 24 ሎኦ ቃላይ
ኤሳ ኢሊሎ ማላ ማልኤሰ፤

- ቦላካ ማዳሲኔ
ፓሌስ።
- 25 ኣሳሰ ሱሬ ሚሳቲዛ ኦጌይ ዳሰ፤
ጊዶ ኣቲን ዉርሴላን
ሃይቆስ ጋሌስ።
- 26 ካላ ኮሺ
ኣሲ ሚኒ ኦላና ማላ ዳንፌሌስ፤
ጋፋይካ ኦሶስ
ሚንፌሌስ።
- 27 ኢታ ኣሲ ኢታቴላ ቆፔስ፤
ኢዛ ሃሳያይካ ጸጊዛ ታማ ማላ።
- 28 ጌላ ኣሲ ኦሺ ዳንፌስ፤
ዘጊርሲ ኣማኔቲዛ
ላጌታ ሻኬስ።
- 29 ጌኔ ኣሲ ባ ሾርዛ ጨሚስ፤
ሎኦ ጊዶንታ ኦጌ
ኢዛ ካሌሌስ።
- 30 ኣይፌራ ቂምኦቲ ቤሲዛ ኣሲ
ጌላቴላ ቆፔስ፤
ባ ሚቴርሻ ሳጺዛ ኣሲ
ኢታሶ ቤስ።
- 31 ፑሉንሊ ቦንቾ ካላቻ፤
ሄሲ ጸሎቴላ
ዱሳን ቤቴስ።
- 32 ዋልቃማ ኣሰ ጊዳናፔ
ዳንዳያ ኣሰ ጊዳላ ሎኦ፤
ባና ሃሪዛዳይ ካታማ ዋልቃን
ሃሪዛዳፌ ኣዴስ።
- 33 ኣሲ ሳማ ዩጌስ፤
ጊዶ ኣቲን ዉርሴላ ፖሎ
ኢሚዛይ ጎዳ።

17

- 1 ኦሺ ዳኢዛሶን ዳኢዛ
ጌታ ጊቢራ ማናፔ
ሳሮይኔ ዋፓይ ዳኢዛሶን
ኡኬላ ሚላ ሚሊ ኪያ።

- 2 ኣኬካንቻ ኣይሌሰ ሹፋሮ ጊዲዳ
 ባ ጎዳ ና ቦላ ማታይ ዴሰ፤
 ሂሰቲዲ ኢሻንታ ማላ
 ኢሰታራ ኢሲፌ ላቴሰ።
- 3 ዋርቃይኔ ቢራይ
 ታማን ፓጩቲዛይሳ ማላ
 ጎዳይ ኣሳ ዋዚና ፒልጊ ዴሌሰ።
- 4 ኢታ ኣሲ ኢታ ሃሳያ ሲዬሰ፤
 ዋርዳንቻይካ
 ጌናንቻ ሃሳያ ኤዘጌሰ።
- 5 ሂዬሳታ ቦላ ቁልጨዛ ኣሲ
 ኢሰታ ሜዲዳይሳ ጩዬሰ፤
 ሃራ ኣሰ ጋኪዛ ሜቶን
 ኡፋዬቲዛ ኣሲ
 ቃጻዬቶንታ ኣቴና።
- 6 ናይታ ናይቲ
 ጨሚዳ ኣሳታሰ ካላቻ፤
 ዬሊዳይቲ ባንታ ናይታሰ ቦንቾ።
- 7 ሎኦ ሃሳያይ ኤያሰ ጊጌና፤
 ዋርዶ ሃሳያይ ዴሬ ኣይሲዛዴሰ
 ኣይ ማላ ዴጸ!
- 8 ማታኤይ ኢሚዛዴሰ ቢታ ማላ፤
 ኢዚ ቢዲ ሶሆ ኡባን ኢዛሰ
 ኢንጄታና ሚሳቴሰ።
- 9 ቆሄቲዲ ባ ቆሆዛ ጌንፊዛ ኣሲ
 ሲቆ ኮዬሰ፤
 ጊዶ ኣቲን ዮኦ
 ዛሪ ዛሪዲ ፒቂዛ ኣሲ
 ኣማኔቲዛ ላጌታ ሻኬሰ።
- 10 ኤያይ ዴቱቶ
 ሊሶን ሾጪን ኤሪዛይሳፌ
 ኣኬካይ ዴኢዛ ኣሲ ጮ ሰሪን
 ኤሪዛይሲ ኣጄሰ።
- 11 ኢታ ኣሲ ማካላ ሚሽ ጸላ ኮዬሰ፤
 ሄሳ ጊሻሰ ኢዛ ቦላ
 ሜንጾ ኢታ ኣሲ ኪቴታና።
- 12 ኤያ ኣሳራ
 ኢዛ ኤያቴላ ማላ

- ጋይታናፔ
ማራታ ቦንቂ ኤኪቺዳ
ማሄይራ ጋይቴላ ኪያ።
- 13 ሎኦ ኦሊዳዳሰ ኢታ
ዛሪዛዳሶፔ
ኢታይ ሙሉካ ጳዩና።
- 14 ኦሽ ዶሜሊ ኤሌ ሃላ
ፖጊ ዩዶ ማላ፤
ሄሳ ጊሻሰ ኦሽ
ሜዴታናፔ
ካሴታዳ ኪቻይቻ።
- 15 ዋርዳንቻ ጸሎ
ጸሎዛ ዋርዶ ጉሲ
ናምኣይካ ጎዳ ሲንፋን
ኢጾቲዳ ኦሶ።
- 16 ኣቶ ኤራቴላ ዴማናሰ
ኢዚ ኮኖንታ ጊሻሰ
ኤያ ኩሼን ጌሊዳ ሚሽ
ኢዛ ኣይ ጎኣኔ?
- 17 ላጌይ ኣይ ዋዴካ ላጌ፤
ኣሻይካ ሜቶ ዋዴሰ ዩሌቴሰ።
- 18 ኣኬካይ ፓጪዳ ኣሲ ባቂ ጫቂዲ
ሃራ ኣሳሰ ዋሴ ጌሌሰ።
- 19 ኦሽ ዶሲዛ ኣሲ ናጋራ ዶሴሰ፤
ኡባቶ ባና ቶቁ ሂሰቲዛዴይ
ባ ቦላ ባሽ ጸይጌሰ።
- 20 ጌላ ቆፋይ ዴኢዛዴሰ ኢንጃቴና፤
ዋርዶ ሃሳይዛ ኣሲካ
ሜቶን ጌሌሰ።
- 21 ኤያ ና ዩሎይ ጨጨሴሰ፤
ኤያ ና ኣዋሰ ኡፋይሲ ዴና።
- 22 ኡፋዬቲዛ ዋዚናይ ሎኦ ጳሌ፤
ጊዶ ኣቲን ሜቂዳ ዋዚናይ
ኣሳሰ ዋልቃ ጳይሴሰ።
- 23 ኢታ ኣሲ ፒርዳ ጌላሳናሰ
ጌማን ማታኤ ኤኬሰ።
- 24 ኣኬካይ ዴኢዛ ኣሲ
ኣቶ ኤራቴላ

- ባ ሲንፋፌ ጳይሴና፤
 ጊዶ አቲን ኤያ ኣይፌይ
 ሳኣ ጋጸ ጋካናሰ ዩዩሰ።
- 25 ኤያ ናይ ባ ኣዋ ጨጨሰሰ፤
 ባና ዩሊዳ ኣዮካ ጸጌሰ።
- 26 ጸሎ ኣሰ ቃጸዮ ቤሴና፤
 ሱሬ ኣሰ ሾጮይ ሎኦ ጊዳና።
- 27 ኣማርዳ ቃላ ሃሳይዛ ኣሲ
 ኣቋ ኤራንቻ፤
 ዋፓ ኣያናይ ዳኢዛ
 ኣሲካ ኣኬካንቻ።
- 28 ኤያ ኣሲ ጮኡ ጊኮ
 ኣቋ ኤራንቻ ሚሳቴሰ፤
 ባ ዶናካ ሺሺ ኦይኪኮ
 ኣኬካንቻ ሚሳቴሰ።

18

- 1 ላጌቴላ ኮዮንታ ኣሲ
 ባ ኣሞ ካሌሰ፤
 ሱሬ ፒርዳካ ኡባ ፓልቄሰ።
- 2 ኤያይ ባ ቆፋ
 ቆንጨሳናሮ ጸላ ዶሴሰ፤
 ጊዶ አቲን ሃራ ኣሳፔ
 ኤራ ኤካናሰ ዶሴና።
- 3 ኢታቴላ ካቋ ካሌሌሰ፤
 ዩላቴላ ዩሺን
 ካዉሻቴላ ዩሰ።
- 4 ኣሳ ዶናፔ ኬኢዛ ሃሳያይ
 ጨማ ሃላ ማላ፤
 ኣቋ ኤራቴላ ፑልቶይካ
 ጸንጌቲዛ ፒሳ ሃላ ማላ።
- 5 ኢታ ኣሰ ማዲዲ፥
 ጸሎዛ ፒርዳ ጌላሲዛይሲ
 ሎኦ ጊዳና።
- 6 ኤያ ኣሳ ዶናይ ኢዛ ቦላ
 ኦሽ ዳንፊሰ፤
 ኢዛ ዶናፔ ኬኢዛ ቃላይ
 ኢዛ ቦላ ዱርቃ ጸይጌሰ።

- 7 ኤያ ኣሳ ሃሳያይ ኢዛ ጳይሴስ፤
ኢዛ ሜቴርሻቲ ኢዛስ
ዎጺማዴ ጊዴቴስ።
- 8 ዘጊራንቻ ቃላይ ማልኦ ቁማ ማላ፤
ኣሳስ ዱጌ ማራጨፎ ጋኬስ።
- 9 ኣዛላ ኣሲ ጳይሴዛ ኣሳስ ኢሻ።
- 10 ጎዳ ሱንሒ ሚኖ ጊምቤ ማላ፤
ጸሎ ኣሲ ሄ ዎጺዱ
ኢታፔ ኣቴስ።
- 11 ዱሬታ ዱሬቴሒ
ኢስታስ ዩሾይ
ጊምቤቲዳ ካታማ ማላ፤
ኢስቲ ባንታ ዱሬቴሓ ኬኤቶንታ
ኣዱሳ ጊምቤ ማላ ቆዴቴስ።
- 12 ኣሲ ኩንዳናፔ ካሴ
ኢዛ ዎዚናይ ኦቶሬቴስ፤
ኣሽኬቴሒ ቦንቸሬ
ሲንሓቴስ።
- 13 ሎኤሒ ሲዮንታ ዲሼ ዛሮይ፥
ኢዛዴስ ኤያቴሒኔ
ዬላ ጊዴስ።
- 14 ኣሳ ኣያናይ
ሃርጌ ዳንዳያና ማላ ማዴስ፤
ጊዶ ኣቲን ኣያናይ
ሜቄሬቲቺኮ
ኢዛ ኦኒ ዳንዳያኔ?
- 15 ኣኬካንቻ ዎዚናይ
ኤራቴሓ ኮዬስ፤
ኣጵ ኤራንቻ ሃይሒ
ሚንሒ ኮዬስ።
- 16 ኢሞታይ ኢሚዛዴስ ኦጌ ዶዬስ፤
ኢዛ ጊታ ኣሳታራካ ኤሪሴስ።
- 17 ባልጋራይ ዪዱ
ባ ቃላ ኢማና ጋካናስ
ካሴቲዱ ዮኦ ሃሳይዳዴይ
ጸሎ ሚሳቴስ።
- 18 ሳማ ዬሲ ፓላማ ቴቄስ፤
ናሞኡ ዎልቃማ

ባሊጋራታካ ሻኬሰ።

- 19 ቆሄቲዳ አሻይ
ገምቤቲዳ ካታማፔ
አፂ መኔሰ፤
ኢዛ ፓላማይካ ገምቤ ፔንጌ
ጎርዲዛ መኖ ኮላታ ማላ።

- 20 ባ ዶናን ሃሳይዳዛፔ
አሲ ባ ኡሎ ኩንፊሰ፤
ባ አንጻርሳፌ ኬኢዳ
ዮኦን ካሌሰ።

- 21 አንጻርሳ ቦላ ሃይቆይኔ
ዴኦ ዋልቃይ ዴሰ፤
ኢዛ ዶሲዛይቲ ኢዚ አይፌ ሜቲሰ።

- 22 ማቾ ዴማዳ አሲ
ሎኦ መሸ ዴመሰ፤
ሄሳይይ ጎዳፔ
ቦንቾ ኤኬሰ።

- 23 ሂዬሳ አሲ አዳሺዲ ሃሳዬሰ፤
ጌዶ አቲን ዱሬይ
ጴቺዲ ዛሬሰ።

- 24 ላጌ ዳርሲዛ አሲ
ባሰ ሜቶ ዳሪሴሰ፤
ጌዶ አቲን አሻፔ አፂዲ
አማኔቲዛ ላጌይ ዴሰ።

19

- 1 ጌላ ዮኦ ሃሳይዛ ኢታ አሳፔ
ባ ዴኦን ቦሬይ ባይንዳ
ሂዬሳ አሲ ሎኦ።

- 2 ኤራቴላ ባይንዳ ዚልኤቴላ
ሎኦ ጌዴና፤
ኤሶ ሄማታይ ኦጌ ባሌሌሰ።

- 3 ኢሲ ኢሲ አሳይ ባ ኤያቴላን
ባ ዴኦ ሞሬሰ፤
ሂሰቲዲ ጎዳ ቦላ ዩሎቴሰ።

- 4 ዱሬቴላ ዳሮ ላጌ ሜጴሰ፤
ጌዶ አቲን ማንቆቴላ
ካሴ ዲዛ ላጌ ሃሴሰ።

- 5 ዋርዶ ማርካይ
 ቃጻዬቶንታ ኣቴና፤
 ዋርዶ ፑኪዛይካ
 ቃጻዬቶንታ ኣቴና።
- 6 ዳር ኣሳይ ሎኦ ሚሳታናሰ
 ዳና ሲንፋን ኣላንፊሰ፤
 ጮ ኣሚዛ ኣሳራ
 ኣሲ ኡባይ ዳቦቴሰ።
- 7 ማንቆ ኢዛ ዳቦ ኡባይ ኢጾሰ፤
 ሂሰቲን ኢዛ ላጌቲ ኣይ ኬና
 ኢዛፔ ባቃታኔ!
 ካሊ ኣዳሺዲካ
 ኢዚ ኢስታ ዴሚና።
- 8 ኣጶ ኤራቴሰ
 ባሰ ሚሽ ኦሊዛይ
 ባና ሲቆሰ፤
 ኣኬካ ሲቁዛዴሰ ኢንጄቴሰ።
- 9 ዋርዶ ማርካይ
 ቃጻዬቶንታ ኣቴና፤
 ዋርዶ ፑኪዛይካ ጳያና።
- 10 ኤያቲ ኢሻሎ ዱሰ
 ዳናሰ ቤሴና፤
 ኣይሌይ ጎዳ ቦላ ጎዳቲኮ
 ሂሲ ኣይ ኬና ኢታ!
- 11 ኣጶ ኤራቴሰ
 ኣሰ ዳንዳያንቻ ኬሴሰ፤
 ቆሆ ዬዲ ኣጶሊ ቦንቸን ጋሌሰ።
- 12 ካዎ ሃንቆይ ጋሞ ጸጎ ማላ፤
 ጊዶ ኣቲን ኢዛ ሲንፋን
 ሳባ ዴሞይ
 ማታ ጪሊሊሲዛ ኢራ ማላ።
- 13 ኤያ ናይ ባ ኣዎ
 ባሻሰ ኣሊ ኢሜሰ፤
 ኦሽ ኤሂዛ ማቻ
 ኢራ ኣሊዛ ኬላ ማላ።
- 14 ኬሊኔ ኣቆታይ
 ዬሊዳይታፔ ላቴቴሰ፤
 ኣኬካራ ዲዛ ማቻ ጎዳፔ ቤታዉሰ።

- 15 አዛላቴሌ ዴጾ ጳሰኮ ኤሄስ፤
ኦሶ ኦሶንታ ኣሲ ጋፌስ።
- 16 አዛዞ ናጊዛይ
ባ ሼምፖ ናጌስ፤
ጊዶ ኣቲን
ኢዞ ኢጲዛዴይ ሃይቄስ።
- 17 ማንቆስ ኪዪዛ ኣሲ
ጎዳስ ታልኤስ፤
ጎዳይ ሄ ሎኦ ኦሶ
ዋጋ ቃንጻና።
- 18 ዋዴራ ኔ ና ሴራ፤
ኢዚ ሃይቆስ ቢሺን
ጮኡ ጋ ጸሎፋ።
- 19 ኤሶን ዪሎቲዛ ኣሲ
ቃጻዬታናስ ቤሴስ፤
ኔኒ ኣጋ ኣጳኮ
ሃራ ዋዴካ
ኔስ ሄሳሶ ኦሶይ ኣቴና።
- 20 ዞሬ ሲያ፤ ሴራካ ኤካ።
ሂስቲኮ ኔኒ ዉርሴላን
ኣጵ ኤራንቻ ጊዳና።
- 21 ኣሳ ዋዚናን ዳር ሃልቾይ ዴስ፤
ጊዶ ኣቲን
ጎዳ ቆፋይ ፖሌቴስ።
- 22 ኣሳፔ ኮዬቲዛይ ሚኖ ሲቆ፤
ዋርዳንቻ ጊዳናፔ
ማንቆቴሌ ሎኦ።
- 23 ጎዳስ ያሺ ዴኦስ ካሌሐስ፤
ሄሳ ማላ ኣሲ ዋፓን ዴስ፤
ኢታይካ ኢዛ ቦቼና።
- 24 አዛላይ ባ ኩሼ ማዳን ዬዴስ፤
ጊዶ ኣቲን ፑዴ ባ ዶናን
ዛራናዉ ዋዬቴስ።
- 25 ቂልፌዛዴ ሾፌኮ
ዋዚና ፓጩይ ኣኬካ ታማራና፤
ኣኬካንቻ ኣሳ ሴሪኮ
ኢዚ ኤራቴሐ ዴማና።
- 26 ባ ኣዋ ቦንቂዛ ናይ፥

- ባ አዮካ ኬሲ ዬዴሊዛ ናይ
 ኢዚ ዬላቴሊኔ
 ካዉሻቴላ ኤሂዛ ና።
 27 ታ ናዘ!
 ታ ዞሬ ኔ ሲዮንታ ኣጊኮ፥
 ኔ ኤሪዛ ቃላካ ባላና።
 28 ዋርዶ ማርካይ
 ሱሬ ፒርዳ ቦላ ቂልጩስ፤
 ኢታ ኣሳ ዶናይ
 ኢታቴላ ባንቺኬስ።
 29 ቂልጩዛይታስ ፒርዳይ፥
 ኤያታ ዘኮስ ሊሶይ
 ጊጊ ኡቲዴስ።

20

- 1 ማሶሲዛ ኡሺ ኡዪዛይ
 ቂልጩዛዴኔ ኤያ ጊዴስ፤
 ሃይታንታን ባሌቲዳ ኡባይ
 ኣጵ ኤራንቻ ጊዴና።
 2 ካዋ ሃንቆይ ጋሞ ጸኅ ማላ፤
 ኢዛ ዪሎቺዛይ
 ባ ሼምፖ ቦላ ፒርዴስ።
 3 ፓላማፔ ሃኮይ
 ኢዛዴስ ቦንቾ፤
 ጊዶ ኣቲን ኤያ ኣሲ ኡባይ
 ኦሻስ ኤሶቴስ።
 4 ኣዛላ ጎሻንቻይ
 ዋዴራ ጎዬና፤
 ካላ ሺሺዛ ዋዴ
 ሺሻናስ ኮዬስ፤
 ጊዶ ኣቲን ኣይኮካ ዴሜና።
 5 ኣሳ ዋዚና ሃልቾይ
 ጨማ ኦላን ዴኢዛ
 ሃላ ማላ፤
 ጊዶ ኣቲን ዋዚናማ ኣሲ
 ሄፔ ዴቂ ኬሴስ።
 6 ዳሮ ኣሳቲ ባንታ
 ኪያቴላ ዮቴቴስ፤

- ጌዶ አቲን አማኔቲዛ አሰ
ኮኒ ዴማናሰ ዳንዳይዜ?
- 7 ዲሎ አሲ ቦሬይ ባይንዳ ዴኦ ዴሰ፤
ኢዛፔ ካሊዲ
ኢዛ ናይቲካ አንጃቲዳይታ።
- 8 ካዎይ ፒርዳናሰ ባ ካዎቲፋ
አልጋን ኡቲዛ ዎዴ
ኢታ ኡባ ባ ኣይፌታን
ሃርቂዲ ኬሴሰ።
- 9 «ታ ዎዚና ጌሻዲሰ፤
ታ ጌሻ፤
ታናን ናጋራይ ባዎ»
ጋናይ ኦኔ?
- 10 ጎዳይ ዎርዶ ማዛኔኔ
ናሞኡ ቆሞ ጌዳራ
ሚሽ ኢዴሰ።
- 11 ናይ ጌሽኔ ሱሬ ጌዲዛይሲ
ኢዚ ኦሊዛ ኦሶን ኤሬቲሰ።
- 12 ሲዪዛ ሃይሊኔ ዶሊዛ ኣይፌ፥
ኢሰታካ ጎዳይ ሜዲዴሰ።
- 13 ዲሰኮ ሲቆፓ!
ኔ ሂሰቶንታ ኣጊኮ ማንቃና።
ሚናዳ ኦላ፤
ሂሰቲኮ ኔኒ ካል ካላና።
- 14 ሻሚዛ አሲ፥
«ሃይሲ ኣልኦ! ቆሂሰ!» ጌሰ፤
ጌዶ አቲን ሻሚ
ሲሚዳፔ ጉዬን፥
«ሂራይሶን ሻማዲሰ»
ጌዲ ጨቁቲሰ።
- 15 ኤራይ ኩሚዳ ቃላ ሃሳይዛ
ሜቲርሻቲ ዎርቃፌኔ
ዞኦ ኢንቁፌካ
ኣዶ ጌዴ።
- 16 ኤሮንታ አሳሰ
ዋሴ ጌሊዛ አሳ ማይኦ
ቃሪ ኤኪቲ፤
ሃዉሻ ማጨሳሰ

- ዋሴ ጌሊዛ አስ ኦይኪቲ። *
- 17 ዋርደን ዳሚዳ ካሏ ማልኤስ፤
ጌዶ አቲን አቂ ፔኢዲ
ደናን አጩ ጌዴስ።
- 18 ዞሬ ኤካዳ ሃልኝ ሃልቻ፤
ዞሬ ኤኮንታ ዳኣሼ
ኦላስ ቦፓ።
- 19 ዚጊራንቻይ ጹራ ላሌስ፤
ሄሳ ጊሻስ ሎምኡሎምኣ
አሳፔ ሃካ።
- 20 ባ አዋ ዋይኮ
ባ አዮ ጫዪዛዴስ፤
ጸምፔይ ሳካና
ጹማን ቶኣና።
- 21 ኮይሮራ ኤሶን ቤቲዳ አቆታስ
ዉርሴላን አንጆይ ዴና።
- 22 ኔሲ ኢታ ኦሴዳ አሳስ፤
«ታኒ ኢዛስ ሃሎ ኬሳና» ጎፓ፤
ጎዳን አማኔታዳ ናፓ፤
ኢዚ ኔና አሻና።
- 23 ጎዳይ ዋርደ ሜዛኔን
ኡፋዬቴና
ናምኡ ቆሞ ጌዳራ
ሚሽ ኢዴስ።
- 24 አሳይ ባናስ ቤሲዛ ኦጌ
ጎዳይ ካሌሴስ፤
ሂስቲን አሲ ባርካ
ባ ባና ኦጌ
ዋስቲ አኬካናስ ዳንዳይዜ?
- 25 ኢሲ ሚሽ ኤሶቲዲ፤
«ሃይሳ ታኒ ጸሳስ ኢማና»
ጌዲ አዲኔቲዳፔ ጉዬ
ዚልኤቴላ አስ ኦይኪዛ ያርዴ።
- 26 አጶ ኤራቴላ ዲዛ ካዎይ
ማካላንቻታ ሻኪ ኤሬስ፤
ኢዚ ኢስታ ቃጴቶንታ ቃጸዬስ።

* 20:16 ሃዉሻ ማጫስ ጊዛይሳስ ቢርሼላይ ካዉሻ ጉሳ።

- 27 አሳ አያናይ ጎዳ ጸምፔ፤
 ሄሳ ጊሻስ
 ጊዶ አሳቴላ ኡባ
 ኢዚ ፒልጊ ጸሌሰ።
- 28 ኪያቴላኔ ቱማቴላ
 ካዎ ናጌቴስ፤
 ኢዛ ካዎቴላ አራታይካ
 ሲቆን ሚኔስ።
- 29 ዬላጋታ ዎልቃይ ኢስታስ ቦንቾ፤
 ጨማታ ፑሉንላ
 ኢስታስ ቦንቾ።
- 30 ሚኖ ቂጻቴይ ኢታቴላ ዲጌስ፤
 ዋቆይ ኢታ ዎዚና ላሜስ።

21

- 1 ካዎ ዎዚናይ
 ጎዳ ኩሼን ዳስ፤
 ኢዚ ኢዛ ዎዚና
 ጎጊዛ ሃላ ማላ
 ባ ዶሲዳሶ ዛሬስ።
- 2 አሲ ቢዛ ኦጌይ ኢዛዳስ
 ሱሬ ሚሳቴስ፤
 ጎዳይ ጊዲኮ
 ዎዚና ፒልጊ ጸሌሰ።
- 3 ያርሾሬ ቦላራ ጸሎኔ
 ሱሬ ፒርዳ ጎዳይ ዶሴስ።
- 4 ኦቶሮይኔ ሃላጫይ
 ኢታ አሳታ ቤሲዛ ማላታ፤
 ሄሲካ ናጋራ።
- 5 ሚኖ አሳንቻ
 ሃልቾይ ዲሬሴስ፤
 ጊዶ ኦቲን ቢቻሪሲ ማንቂሴስ።
- 6 ዎርዶቲዲ ዳጋሲዳ አቆታይ
 ቆይዛ ፔንታ ማላ፤
 ቃሴካ ዎቂዛ ዎጺማዴ ማላ።
- 7 ኢታቲ ሱሬ ኦሶ ዶሶንታ ጊሻስ
 ኢታታ ኢስታ ማካላቴላ
 ቆይሳና።

- 8 ሞራንቻቲ
 ጌላ ኦጌራ ሄመቴቴሰ፤
 ጊዶ አቲን ጌሻቲ ሱሬ ሃኔቴሰ።
- 9 ዱናማ ማቺራ ዳናፔ
 ከላ ዳራንቻን
 አቆይ ሎኦ።
- 10 ኢታቲ ኢታ ሚሽ ኦፋናሰ
 ኬሂ አሞቴቴሰ።
 ኢዛ ላጌይ ኢዛፔ
 ቃጴታ ዴማና።
- 11 ቂልጨዛዴይ ቃጸዬቲዳ ዋዴ
 ዋዚናይ ፓጨዳ አሲ
 አጵ ኤራቴላ ታማሬሰ፤
 ዋዚናማ አሲካ ታማርዲ
 ኤራቴላ ዴሜሰ።
- 12 ጸሎ ጸሳይ ኢታታሶን
 ኦሴቲዛ ኡባ ጨዲ ጴሌሰ፤
 ኢሰታ ሙሌራ ቋይሴሰ።
- 13 ማንቆ ዋሶ ሲያናፔ ጊዲ
 ባ ሃይላ ቱጨኮ
 ኢዚካ ዋሲዛ ዋዴ
 አሊዛ አሲ ቋያና።
- 14 ጌማን ኢሚዛ ኢሞታይ
 ሃንቆ ዶሽሴሰ፤
 አፋላ ጊዶራ አሚዳ ማታኤይ
 ሱሌ ሃንቆ ኢርጸሴሰ።
- 15 ሱሬ ፒርዳይ ጸሎታ ኡፋይሴሰ፤
 ኢታ ኦሊዛይታ ጊዲኮ
 ሺሮሴሰ።
- 16 አኬካ ኦጌፔ ካሬ ኬዚዛ አሲ
 ሞይቲሌ ዱላታን ሽምፔሰ።
- 17 ሃላጫ ዱሰ ዳና
 ኮይዛ አሲ ማንቁሰ፤
 ኡሺኔ ሙሰ
 ጎዲዛ አሲ ዱሬቴና።
- 18 ጸሎታ ቦላ ዪዳ ሜቶይ
 ኢታታ ቦላ ሲማና፤
 ሱሬ አሳታ ቦላ ዪዳ ሜቶይ
 አማኔቶንታይታ ቦላ ጋካና።

- 19 ዋጫሚዛኔ ደናቲዛ
ማቺራ ዳናፔ
ባዘን ዱሲ ኪያ።
- 20 ዋዚናማ አሳ ሶን
ማልኦ ቁማይኔ
ዛይቲይ ዳጋቲ ዴሰ፤
ጊዶ አቲን ኤያ አሲ
ባሰ ዲዛይሳ፥ ባይንዳ
ኡባ ዲፒ ሂሰቲ ሜሰ።
- 21 ዲሎቴሊኔ ሲቆ
ካሊዛዴይ ዴኦ፥
ዴሬቴሊኔ
ቦንቾ ዴሜሰ።
- 22 ዋዚናማ አሲ
ዋልቃማ ኦላንቻቲ ዲዛ
ካታማ ሜንሊ ጌሌሰ፤
ኢሰቲ አማኔቲዳ ሚጻታካ
ላሊ ዬጌሰ።
- 23 ባ ደናኔ ባ ኢንጻርሰ ናጊዛ አሲ
ባና ቦሻፔ ናጌሰ።
- 24 ኦቶራንቻይኔ ሃላጫ አሲ
ቂቶንቻ ጌቲቲሰ፤
ኢዚ ኦቶሮ ሃኖ ሃኔሰ።
- 25 አዛላ አሞይ ዋዴሰ፤
አይሰ ጊኮ
ኢዚ ኦፋናሰ ኮዬና።
- 26 አዛላይ ጋላሰ ኩሜል
አሞቲሼ ፔኤሰ፤
ዲሎይ ጊዲኮ ኡዜቶንታ ኢሜሰ።
- 27 ኢታ አሳ ያርሾይ ሃራሴሰ፤
ኢታ ቆፋን ሺሺዛ ጊዲኮ
አይ ማላ ኢታ ጊዳኔ?
- 28 ዋርዶ ማርካይ ቋያና፤
ጊዶ አቲን ቱሙ ማርካቲዛይ
ሚኒዲ ዴኣና።
- 29 ኢታ አሲ ቤሶንታዝ ጸላ ጸሌሰ፤
ጊዶ አቲን ሱሬ አሲ
ዩሺ ቆፔሰ።

- 30 አሲ ባ ኤራን፣ አኬካኒኔ
 ሃልቸን ጎዳራ
 ኤቄታናሰ ዳንዳዬና።
 31 አላ ጋላሳሰ ፓራ ጊጊሴሰ፤
 ጊዶ አቲን ጸኖይ
 ጎዳፔ ዬሰ።

22

- 1 ሎኦ ሱንሊ
 ዳሮ ዱሬቴላፌ አዴሰ፤
 አሳ ማታን ቦንቹቴሊካ
 ቢራፔኔ ዋርቃፌ አዴሰ።
 2 ዱሬኔ ማንቆ ኡባ
 ጎዳይ ሜዲዴሰ፤
 ሄሳን ኢሰታ ናይካ ኢሲ ጊና።
 3 አኬካንቻ አሲ ኢታ ቤኢዱ
 አታናሰ ባቃቴሰ፤
 ጊዶ አቲን አኬካይ ፓጪዳ አሲ
 ሜቶን ጌሊዱ ቆሂቴሰ።
 4 አሽኬቴሊኔ ጎዳሰ ያሺ፣
 ዱሬቴላ፣ ቦንቹኔ
 ዴኦ ኢሜሰ።
 5 ኢታ አሳ ኦጌን አጉንሊኔ
 ያርዴይ ዴሰ፤
 ጊዶ አቲን ባና ናጊዛ አሲ
 ሄሳፌ ሃኬሰ።
 6 ናይ ዋኒዱ ዴእና ቤሲዛኮ
 ታማርሳ፤
 ሂሰቲኮ ኢዚ ጨሚዳካ
 ሄሳፌ ሃኬና።
 7 ዱሬይ ማንቆ ሃሬሰ፤
 ታልኤ ኤኪዳዴይ ታልኤ
 ኢሚዳዴሰ ኣይሌ ጊዴሰ።
 8 ኢታቴላ ዜሪዛ አሲ ዋዬ ጫኬሰ፤
 ኢዛ ሃንቆ ጉፌይ ዳያና።
 9 ኪያ አሲ አንጃቴሰ፤
 ባ ቁማፔካ ሂዬሳሰ ኢሜሰ።
 10 ቂልጪዛ አሰ ዲጋ፤

- ሂሰቲኮ ፓላማይ አታና፤
ኦሺኔ ጫሺካ ጳያና።
- 11 ዋዚና ጌሻቴሰ ዶሲዛ አሲኔ
ዶናፔ ሎኦ ሃሳይዛ አሳራ
ካዎይ ላጌቴሰ።
- 12 ጎዳ አይፌቲ ኤራቴሰ ናጌቴሰ፤
ጊዶ አቲን ዋርዳንቻታ ቃላ
ሃዳ ኬሴሰ።
- 13 አዛላ አሲ፥
«ጋሞይ ካሬን ዴሰ፤
ታና ኦጌን ዋሳና» ጌሰ።
- 14 ላይማ ማጫሳ ዶናይ
ጨማ ኦላ ማላ፤
ጎዳይ ሃንቄቲዳ አሲ
ኢዚን ዉሌሰ።
- 15 ና ዋዚና ኤያቴሰ
ባቂ አይኬሰ፤
ጊዶ አቲን ሴራ ሾኝ
ኢዛፔ ሃሴሰ።
- 16 ባሰ አቆታ ጉጃና ጊዱ
ሂዬሳ ናቂዛይኔ
ዱሬሲ አሞታ አሚዛይ
ናይካ ማንቃና።

- አጽ ኤራንቻ ዞሬ ሄቩ ታማታ
- 17 አጽ ኤራንቻ ዞሬ
ዋዚናፔ ሲያ፤
ኔ ዋዚናይካ
ታ ቲሚርቴኮ ሲሞ!
- 18 አይሰ ጊኮ
ኢሰታ ኔ ዋዚናን ዋሊኮ፥
ኔ ዶናንካ
ኢሰታ ኡባ ሃሳይኮ
ኔ ኡፋዬታና።
- 19 ኔ አማኖይ
ጎዳን ጊዶና ማላ
ታኒ ኔና ሃኝ ታማርሳይሰ።
- 20 ታኒ ኔሲ ዞሬኔ

- ኤራቴል አሚዛ
ሎኦ ተሚርቴታ ጸፋቤኪና?
21 ኔና ኪቲዳይሳሰ ቤሲዛ
ዛሮ ዛራና ማላ፥
ታኒ ኔና ቱማኔ
አማኔቲዳ ቃላታ
ታማርሳና ማላ ጊዴኔ?
22 ሂዬሳታሲ አይኮይካ ባይንዳ
ጊሻሰ ኢሰታ ቦንቆፋ፤
ሺሎታንካ ሜቶታንቻታ
ዋዪሶፓ፡፡
23 አይሰ ጊኮ ጎዳይ
ኢሰታ ጊሻሰ ሞቲታና፤
ኢሰታ ቦንቂዳይታካ
ኢዚ ቦንቃና፡፡
24 ሃንቄቲዛ አሳራ ላጌቶፓ፤
ሃንቄታናሰ ኤሶቲዛ
አሳራካ ዙፔቶፓ፡፡
25 ኔኒ ኢዛ ሃኖዛ ሜዜቲኮ፥
ጉዬፔ አጋናዉ ዳንዳያካ፡፡
26 ዋሴ ጌላናሰ ጫቆፋ፤
አሳ አጮ ቃንጸናሰ
ዋሴ ጌሎፓ፡፡
27 ኔሲ ቃንጸዚዚ ዳይኮ፥
ኔ ኢቺዛ አልጋይካ
አቶንታ ኤኬታና፡፡
28 ኔ አዋቲ ኤሲዳ
ቤኒሶፌ ዲዛ ዛዋ ሾዶፋ፡፡
29 ባ ኦሶን ሎሂዳ አሰ ቤያዲ?
ኢዚ ካዎታሰ ኦፊሲፔ አቲን
ቤሶንታ አሳታሰ ኦፊና፡፡

23

- 1 ኔኒ ዳሬ ሃሪዛይሳራ
ካል ማናሰ ኡቲዳ ዋዴ፥
ኔ ሲንላን ዳኢዛይሳ
ሎኤፋዳ አኬካ፡፡
2 ኔኒ ዳሮ ዮራ አሰ ጊዲኮ፥

- ከሂፔ ናጌታ።
- 3 ኢዚ ኔና ፓጫናስ
ዳንዳይዛ ጊሻስ፤
ሽቂዳ ማልኦ ቁማስ ዪቄቶ።
- 4 ዱሬታና ጋዳ ዳቡሮፓ፤
ሃይሳ ማላ ቆፋ ኣጋናስ
ኣኬካንቻ ጊዳ።
- 5 ሄሳ ማላ ዱሬቱላ ቦላ
ኔኒ ኔ ኣይፌ ዋሊኮ
ሄራ ዳያና፤
ቄፌ ኬሲዳ ጎሌ ካፎ ማላ
ሳሎራ ፓላና።
- 6 ኡዜ ኣሳ ካል ሞፓ፤
ማልኢዛ ኢዛ ካል
ማናስ ኣሞቶ።
- 7 ቆጆፔ ቆሞን ኢዚ ኔና፤
«ማ፤ ኡያ» ጌሲፔ ኣቲን
ኢዛ ዋዚናይ ኔናራ ዳኤና።
- 8 ኔኒ ሚዳ ጉላ ካሳይካ
ኔና ጮሻና፤
ኔ ጋላታይካ ሃዳ ጊዳና።
- 9 ኤያራ ሃሳዮፓ፤
ኣይስ ጊኮ
ኔ ኣጵ ኤራ ሃሳያ
ኢዚ ካዳና።
- 10 ቤኒሶፌ ዲዛ ዳሳ ሾዶ።
ቃሴ ዪኦ ናይታ ጋዴ ሱጎፓ፤
- 11 ኣይስ ጊኮ ኢስታ
ኣሺዛ ጎዳይ ሚኖ፤
ኢዚ ኢስታ ጊሻስ ኔናራ ሞቲታና።
- 12 ኔ ዋዚና ዘሬስ፤
ኔ ሃይላካ ኤራቱላ
ቃላኮ ዛራ።
- 13 ኔ ና ሴራናፔ ጉዬ ጎፓ፤
ኔኒ ቂርጨንቻን ሾጨኮ

ኢዚ ሃይቄና።

14 ኔኒ ቂርጨንቻን ሾጫ፤

ኢዛ ሾምፖ ሃይቆፔ አሻ።

15 ታ ናዞ!

ኔ ዋዚናይ አጾ

ኤራንቻ ጊዲኮ

ታ ዋዚናይካ ኡፋዬቴሰ።

16 ኔ ኢንጸርሳይ ሱሬ ሃሳይዛ ዋዴ

ታ ዋዚናይ ኡፋዬቴሰ።

17 ናጋራንቻታ ቦላ ቃናቶፓ፤

ጊዶ አቲን ኡባቶ ጎዳሰ

ያሻቴሰ አጎፋ።

18 ሂሰቲኮ ኔሰ ሲንላፌ ኪያና፤

ኔ ሂዶታይ ሃዳ ጊዳና።

19 ታ ናዞ! ሲያ፤ ዋዚናማ ጊዳ፤

ኔ ዋዚናይ ሱሬ ኦጌፔ

ካሬ ኬዞፖ።

20 ዳሮ ዋይኔ ኡሹ ኡዪዛይታራኔ

አሾ ሙሳሰ

ያሬቲዛይታራ ዙፔቶፓ።

21 አይሰ ጊኮ ማሶቲዛይቲኔ

ዮራቲ ማንቃና፤

ጲሰኮ ዳሮይ ጫርቃ ማይዜሰ።

22 ኔና ዬሊዳ አዋይ ዮቲዛይሳ ሲያ፤

ኔ አዪያካ

ጨጌዳ ዋዴ ካጶፓ።

23 ቱማ ሻማፌ አቲን

ሙሌካ ባይዞፓ፤

አጾ ኤራቴሰ፣ ሴራኔ

አኬካ ኔሰ ሚሼ ኦላ።

24 ጸሎ ና አዋይ

ኬሂፔ ኡፋዬቴሰ፤

ዋዚናማ ና ዬሊዳ አሲካ

ኢዛን ኡፋዬቴሰ።

25 ኔ አዋይኔ ኔ አያ ኡፋዬቴቶ፤

ነና ዩሊዳራካ ኡፋዬቱ።

26 ታ ናዘ!

ኔ ዋዚና ሃ ታኮ ዛራ፤
ኔ አይፌቲ ታ ኦጌፔ
ካሬ ኬዘፔቶ።

27 አይሰ ጊኮ ላይማ ማጫሳያ
ጨማ ኦላ ማላ፤

ላጌሶ ማቻ
ጹንሳ ኦላ ማላ።

28 ኢዛ ፓንጋ ማላ ዛማዳ ናጋዉሰ፤
አማኔቶንታ አዴታ
ዴሬ ጊዶን ዳርሳዉሰ።

29 «ዋ!» ጊዛ ዋሶይ ኦሴ?
ጨጫይ ኦሴ? ኦሺ ኦሴ?
ዙዙንሳ ኦሴ?
ጋሶይካ ባይንዳ
ማዲንሳ ኦሴ?
አይፌይ ዘኢዛይ ኦሴ?

30 ዋይኔ ኡሹ ኡዩሹ
ጋምኢዛይታሰ ጊዴኔ?
ዋላኬቲዳ ዋይኔ ኡሹ
ዩዩ ዩዩ
ጋንጺዛይታሰ ጊዴኔ?

31 ዋይኔ ኡሺ ዘኢዳ ዋዴ፥
ኢዛ ሜፋይ ቢሪሌ ጊዶን
ጸሊዛ ዋዴ፥
ዱቂሺን ጮርኙ ጊ ጌሊዛ ዋዴ
ኢዛ ቲሺ ሂሰታ ጸሎፋ።

32 ዉርሴላን ኢዚ
ሾሻ ማላ ዲኬሰ፤
ጎፔ ሾሻ ማላካ
ባ ዪሻ ፑኬሰ።

33 ኔ አይፌይ ቤዩ ኤርንታዝ ቤያና፤
ኔ ዋዚናይካ ኤሎሜታና።

34 ኔኒ አባ ጊዶን ዲዛ
ማርካቤ ጸራን

ኢቺዳ አሳ ማላ ጊዳና።
 35 ኔኒ፥ «ኢሰቲ ታና ዳቺዳ፤
 ጊዳ አቲን ታኒ ቆሄታቤኬ፤
 ኢሰቲ ታና ዋቂዳ፤
 ጊዳ አቲን ታሰ ኤፊቲቤና።
 ሃራ ኡሻ ኡያናሰ
 ታኒ አዉዴ
 ዴንዳንዲናሻ?» ጋና።

24

- 1 ታ ናዞ! ኢታ አሳታ ማላ
 ጊዳርኪና ጎፓ፤
 ኢሰታራ ላጌቴሊካ
 ኔና ሎኦ።
- 2 ኢሰቲ ኡባቶ ማካላ
 ሚሽ ማቄቴቴሰ፤
 ባንታ ኢንጸርሳንካ
 ጌኔ ሃሳዬቴሰ።
- 3 ኬሊ አቶ ኤራቴላን
 ኬዴቴሰ፤
 አኬካንካ ሚኔሰ።
- 4 ኤራይ ዴኢኮ፥
 ኬሊ አልኦኒኔ
 ሎኦ ሚሻን ኩሚሰ።
- 5 ዋዚናማ አሳሰ ጊታ ዋልቃይ ዴሰ፤
 ኤራንቻ አሲካ
 ሚኖቴሰ ጉጁሰ።
- 6 ኦላ ኦሊታናሰ ኔሰ ሎኦ ዞሬ
 ጸኖ ዴማናሰካ
 ዳሮ ዞራንቻታ ኮሺሰ።
- 7 ኤያ አሲ አቶ ኤራቴላፌ
 ኬሂ ሃሆን ዴሰ፤
 ዱላታ ሲንላን ኤቂዲ
 ሃሳያና ዳንዳዬና።
- 8 ኢታ ኦላናሰ ሃልቺዛ አሲ

- «ጌናንቻ» ጌቴቴሰ።
 9 ኤያቴላ ቆፋይ ናጋራ፤
 ቂልጪዛዴ አሲ ኢዴሰ።
- 10 ኔኒ ሜቶ ጋላሰ ላፊኮ፥
 ኔ ዋልቃይ ኣይ ማላ ጉፉ?
- 11 ሃይቆሰ ላጌቲ ቢዛይታ ኣሻ፤
 ሹኬታናሰ ጎሼቲ
 ቢዛይታ ኣሻ።
- 12 ኔኒ፥ «ታ ሃይሳ ኤሪኬ» ጊኮ፥
 ዋዚና ፒልጊ ኤሪዛይሲ
 ኢዚ ኣኬኬኔ?
 ኔ ሹምፖ ናጊዛይሲ ኤሬኔ?
 ኣሰ ኡባሰ ኢዛ
 ኦሶ ኦሶ ማላ ኢሜኔ?
- 13 ታ ናዘ!
 ሎኦ ጊዲዳ ጊሻሰ ኤሳ ማ፤
 ኢሊሎ ኤሲ ዶናን ማልኤሰ።
- 14 ኣጵ ኤራቴሷካ ሄሳ ማላ፤
 ኢዚ ኔ ሹምፖሰ
 ማልኦ ጊዲዳይሳ ኤራ።
 ኔኒ ኢዞ ዴሚዛ ጊዲኮ
 ዋንቶ ኔሰ ዜምፖ ጊዳና፤
 ኔ ሂዶታይካ ሃዳ ጊዴና።
- 15 ጸሎ ኣሳ ኬላ ቦንቃናሰ
 ፓንጋ ማላ ዛማዶፓ፤
 ኢዛ ኬላ ቦላ ሜቶ ጋሶ።
- 16 ጸሎ ኣሲ
 ላፑንቶ ኩንዲኮካ ዴንዴሰ፤
 ጊዶ ኣቲን ኢታቲ
 ሜቶን ጳዩቴሰ።
- 17 ኔ ሞርኬይ
 ኩንዲዛ ዋዴ ኡፋዬቶፋ፤
 ኢዚ ቆጶቲዛ ዋዴካ
 ኔ ዋዚናን፥ «ሃሹ!» ጎፓ።

- 18 ኔ ሂሰቶንታ አጊኮ
 ጎዳይ ሄሳ በኢዲ ኡፋዬቴና፤
 ኢዚ ባ ሃንቆዛ
 ኔ ሞርኬዛ ቦላፌ ዛራና።
- 19 ኢታ አሳታ ኦሶን ጨፎጮፓ፤
 ኢሰታ ማላ ጊዳርኪና ጎፓ።
- 20 ኢታ አሳሰ ሂዶታይ ባዋ፤
 ኢታታ ጸምፔይ ቲፒ ጊዲ ቶኣና።
- 21 ታ ናዞ! ጎዳሲኔ
 ካዋሰ ያያ፤
 ማካሊዛይታራካ ዙፔቶፓ።
- 22 አይሰ ጊኮ ሄሳ ማላ አሳታ
 ቆፖንታ ሜቶይ ጋኬሰ፤
 ካዋፔኔ ጎዳፔ ያና
 ሜቶ ኦኔ ኤሪዛይ?
- አጼ ኤራንቻይ ጉጂ ዮቲዳ ሃራ ሌሚሶታ
- 23 አጼ ኤራንቻቲ
 ጉጂዲካ ሃይሳሉ ጊዳ፤
 ፒርዲሺ ማዶ ፒርዳይ
 ሎኦ ጊዴና።
- 24 ሞራንቻ፥ «ኔኒ ጸሎ» ጊዛዴ
 ዴሬይ ቃንጌሰ፤
 ካዋቴላቲካ ኢዛ ሂሌቴሰ።
- 25 ጊዶ አቲን ሞራንቻ፥
 «ኔኒ ሞራዳሳ» ጊዛይታ
 ኢሰታራ ሎኦ ሚሺ ጋይታና፤
 ኢሰታሰ ኬሂ ዳሮ ኣንጃይ ያና።
- 26 ሱሬ ዛሮ ኢሞይ
 ዶና ዬሬቴላ ማላ።
- 27 ካሴታዳ ኔ ካሬን ዲዛ ኦሶ ኦላ፤
 ኔ ጎሻ ጊጊሳ፤
 ሄሳፌ ጉዬ ኔ ኬላ ኬጻ።

- 28 ኔ ሾርዛ ቦላ
 ጋሶይ ባይንዳ ማርካቶፋ፤
 ኔ ደናንካ ጨሞፋ።
- 29 ኢዚ ታሰ ኦሊዳ ማለ
 ታኒ ኢዛሰ ኦላና፤
 «ታኒ ኢዛሰ ኢዛ ኦሶ
 ኩሼ ዛራና» ጎፓ።
- 30 ታኒ ኣዛላ ኣሳ ጋዴራ ኣቋዲሰ፤
 ኣኬካይ ፓጪዳ ኣሳ
 ዋይኔ ቱራ ጊደራ ካንፋዲሰ።
- 31 ኡባሶን ኣጉንላ ሞኪዳሰ፤
 ጋዳ ሻራፋይ ጎዚዳሰ፤
 ገምቤይካ ላሌቲዳሰ።
- 32 ታኒ ቤኢዳይሳ ዩሻ ቆፓዲሰ፤
 ታኒ ቤዮይሳፌ
 ቲሚርቲ ዳማዲሰ።
- 33 ኔኒ፥ «ጉላራ ሊጲጲ ጋይሰ፤
 ጉላራ ቋሰካ ኤካይሰ፤
 ኔ ኩሼዛካ ሺሻዳ
 ጉላራ ሺሞፓ
 ኤካይሰ» ጊኮ፥
- 34 ማንቆቴሉ ኔ ቦላ
 ፓንጋ ማለ ያና፤
 ፓጩይካ ኦላ ሚሻ
 ኦይኪዳ ኣሳ ማለ ፑቱ ጋና።

25

ሶሎሞንይ ዳፊዳ ሃራ ሌሚሶታ

- 1 ዩሁዳ ካዋ ሂዘቂያሳ ኣሳቲ ዲቂዲ ዳፊዳ ሶሎሞንይ ሌሚሶቲ
 ሃይሳፌ ካለዚይታ።
- 2 ጹራ ጌንሶይ ዳሳሰ ቦንቾ፤
 ጹራ ፒልጊዲ ኬሶይ
 ካዋታሰ ቦንቾ።

- 3 ሳሎታ ቶቃቴላኔ

- ሳኦ ጨማቴላ
ኣሲ ጋኮንታይሳ ማላ፥
ካዎታ ቆፋካ ኣሲ ፒልጊ
ኤራናሰ ዳንዳዬና።
- 4 ቢራፔ ቂታ ዲጋይቻ፤
ዎጋጨይካ ቆጶዲ
ሎኦ ሚሽ ኬሳና።
- 5 ካዎ ሲንላፌ ኢታታ ዲጋይቻ፤
ሂሰቲኮ ኢዛ ካዎቴላ ኣራታይ
ጸሎቴላን ሚኒ ኤቃና።
- 6 ካዎ ሲንላን ኔና
ጶቁ ጶቁ ሂሰቶፋ፤
ጊታ ኣሳታ ጊደን
ቤታናሰ ኣሞቶፋ።
- 7 ጊታ ኣሳ ሲንላን
ኔና ካዉሻናፔ
ኢዚ ባርካ ኔና፥
«ሃይሶ ጶቁ ጋ»
ጊኮ ኔሰ ሎኦ።
- 8 ኔ ኣይፌዛን ቤኢዳ ኡባ
ማርካታናሰ ዱቡሻ
ባናሰ ኤሶቶፓ፤
ኣይሰ ጊኮ
ኔኒ ማርካታ ሲሚን፥
ሃራ ኣሲ ኔ ማርካቴላይ
ባላ ጊዲዳይሳ ቆንጨሲኮ
ኔኒ ዬላታና።
- 9 ኔሲኔ ኔ ላጌዛሰ ጊደን
ፓላማይ ሜጴቲኮ፥
ሄ ፓላማ ጋርሳን
ሃራ ኣሳ ጹራ ቆንጨሶፓ።
- 10 ሂሰቶንታ ኣጊኮ
ኔኒ ዮቴዛይሳ ሲዬዳ ኣሲ
ኔና ካዉሻና፤

ሄሳን ኔ ሱንሳይ
ናምአንሶ ሲሚዲ
ሎኦንታ ማላ ሞሬታና።

11 ኮሺዛ ዋዴዛን
ሃሳዬቲዳ ሊኮ
ቃላይ ቢራ ቦላ ቲጌቲዳ
ዋርቃ አሌቆ ማላ።

12 አጾ ኤራቴላ ዲዛ አሲ
ዘሪዛ ዘሬይ ኤዘጊዛ አሳሰ
ሃይላን አሊዛ ዋርቃ ማላ፤
ዋይኮ ሙሩታ ዋርቃፌ
ኦሴቲዳ አሌቆ ማላ።

13 ካላ ሺሺዛ ዋዴ ኢርጸ ሃሊ
ኡዪን አሊዛ ማላ፤
አማኔቲዛ ኪታንቻይ
ባና ኪቲዛይታ ኡፋይሴሰ።

14 ኢሞንታይሳ፥ «ኢማና» ጌዲ
ጮ ፓፖቲዛ አሲ
ኢራይ ባይንዳ ሻራኔ ጫርኮ ማላ።

15 ዳንዳያንቻ አሲ
ዴሬ ሃሪዛዴ
ዮቲ ማይዜሰ፤
ሊቆ ቃላይ
ሜቄላ ካንሊ ጌሌሰ።

16 ኤሰ ዴሚኮ ጊናራ ማ፤
ጊዶ አቲን ዳርሲኮ
ኔና ጹጋና።

17 ኔና ኡፊዲ ኢጸንታ ማላ
ኔ ላጌ ሶ ኡባቶ ቦፓ።

18 ባ ላጌዛ ቦላ ዋርዶራ
ማርካቲዛ አሲ ኮጼይ፥

ገላ ማሻይኔ ዋንዳፌይ
አሰ ቆሂዛ ማላ ቆሂሰ።

- 19 ሜቶ ዋዴ አማኔቶንታ
አሳን ዜምፖይ፥
ቃጺዛ አቻን
ጮሚዛ ማላኔ
ሲሊዳ ቶሆን ሄሜቲዛ ማላ።

- 20 ጩጩ ኡቲዳ አሳሰ ማዛሙሬ ዩዴላ
ሚጎ ጋላሰ
ማይኦ ቃሪዛ ማላኔ
ማዴንሳ ቦላ ጸጊዛ ሚሽ
ቲጊዛ ማላ።

- 21 ኔ ሞርኬይ ጋፊኮ ሚዛ፤
ሳሜቲኮ ኡሻ።

- 22 ኔኒ ሄሳላ ኦሊኮ
ኢዛ ሁኤን ታማ ቦንቆ ካሺዲ
ቆሊዛዴ ማላ።
ጎዳይካ ኔ አሶሰ
ዋጋ ኢማና።

- 23 አርሼይ ሞኪዛ ባጋ ጫርኮይ
ኢራ ኤሂዛ ማላ፥
ዘጊርሲ ሃንቆ ኤሂሰ።

- 24 ዱናማ ማቺራ
ኢሲ ኬላን ዴኣናፔ
ኬላ ዳራንቻን
ዴላ ሎኦ።

- 25 ዳቡርዳ አሲ ኢርጸ ሃሐ
ኡዱዲ አሊዛ ማላ
ሃኮ ቢታፌ ዪዛ
ሎኦ ቃላይ ኡፋይሴሰ።

- 26 ኢታ አሳ ሲንላን
ኩንዲዛ ጲሎ አሲ

- ቡልቆቲዳ ፑልቶኔ
 ሞሬቲዳ ኦላ ሃፋ ማላ።
 27 ዳሮ ኤሳ ሙሲ ሎኦ ጊዳና፤
 ሄሳሶካ ባሰ ቦንቾ
 ኮሺ ቦንቹሴና።
 28 ባና ሃሮንታ ኦሲ
 ጊሞቤይ ላሌቲዳ ካታማ ማላ።

26

- 1 ቦኔን ሻቹ፣ ካሐ ሺሺዛ ዋዴንካ
 ኢራይ ኮሾንታይሳ ማላ፣
 ኤያሰ ቦንቾይ ኮሺና።
 2 ካፎቲ ያኔ ሃ ፓሊሼ
 ኦሰ ቆሆንታይሳ ማላ፣
 ጋሶይካ ባይንዳ
 ቃንጊዛ ቃንጌሊ
 ኦሰ ጋኬና።
 3 ፓራሲ ሊሶ፣
 ሃሬሰ ኦንጫፋ ኮሺዛይሳ ማላ፣
 ኤያ ዘኮዛሰ ዱርቃ ኮሺሰ።
 4 ኤያ ኦሳሰ
 ኢዛ ኤያቴፋ ማላ ዛርፓ፤
 ዛሪኮ ኔኒካ
 ኢዛ ማላ ጊዳና።
 5 ጊዲኮካ ኤያሰ
 ኢዛ ኤያቴፋ ቤሳ፤
 ሂሰቶንታ ኦጊኮ ኢዚ ባና
 ኤራንቻ ማላ ቆዳና።
 6 ኤያ ኦሳ ቦላ ኪታ ዬዶይ
 ባርካ ባ ቶሆታ
 ቃንጺዛይሳ ማላ፤
 ዋይኮ ዋጲዛ
 ማርዜ ኡሻ ማላ።
 7 ኤያ ኦሳ ሌሚሶይ
 ሲሊዳ ቶሆ ማላ።
 8 ኤያ ኦሳሰ ቦንቾ ኢሞይ
 ያንባርሻ ቦላ

ቃቺ ዋሊዲ
የሺዛ ሹቻ ማላ።

9 ኤያ አሳ ሌሚሶይ
ማላቲዳ አሳ ኩሺን ኤቂዳ
አጉንሳ ማላ።

10 ኤያ አሰ ዋይኮ
ባሰ ኦጌራ ካንሊ ቢዛ አሰ
ኦሶስ ቃጸሪዛ አሰ
ባ ዋንዳፌን ጮ ደሚዳ አሰ
ዱኪ ማዱንሊዛ አሳ ማላ።

11 ካናይ ባ ጮሺ
ሲሚ ላጪዛ ማላ፥
ኤያይ ባ ኤያቴላ ኦሶ
ዛሪ ዛሪ ዩጌስ።

12 ባርካ ባና፥
«ታኒ አቶ ኤራንቻ»
ጌዛ አሰ ቤያዲ?
ኢዛፔ ኤያ አሳሰ
ሎኦ ቃዳይ ዴስ።

13 አዛላይ፥ «ኦጌን ጋሞይ ዴስ፤
ያሺዛ ጋሞይ
ዋጋ ኦጌን ዩዬስ» ጌስ።

14 ፔንጌይ ባ ማጻፋ ቦላን
ያኔ ሃ ቃጸዛ ማላ
አዛላይካ ባ ሂጸን ያኔ ሃ
ሺሬቲ ሺሬቲ ዋዴስ።

15 አዛላይ ባ ኩሺ ማዳን ዩዴስ፤
ጌዶ አቲን ፑዴ ባ ዶናን
ዛራናሰ ዋዬቴስ።

16 አዛላ አሲ አኪካን ዮቲዛ
ላፑን ኤራንቻታፔ
ባና አቶ ኤራንቻ
ጌዲ ቆፔስ።

- 17 ባና ጋሉንታ አሳ ዮኦን
ጉፒ ጌሊዛ አሲ
ካና ሃይሐ ኦይኪዛ አሳ ማላ።
- 18 ጎዪዛ አሲ ታማ ጺፋ ኦሊዛ ማላ
ዎይኮ ዋንዳፌ ዱኪዛ ማላ፤
- 19 «ታኒ ካሳስ ኦሳዲስ» ጊሼ
ባ ላጌዛ ጨሚዛ አሲካ
ሄሳ ማላ።
- 20 ሚሊ ወሪኮ ታማይ ቶኤስ፤
ዘገርሲ ሳይኮ ኦሺ ኦቴስ።
- 21 ጺጺንሊ ቦንቆ ዳርሲዛይሳ ማላኔ
ሚሊ ታማ
ዳርሲዛይሳ ማላ፥
ዶናማ አሲ ኦሽ ዳሪሴስ።
- 22 ዘገርሳንቻ ቃላይ
ማልኦ ቁማ ማላ
አሳስ ዱጌ ማራጩ ጋኬስ።
- 23 ዎዚናን ኢታ ሚሺ ዲሺን፥
ባ ኢንጻርሳን ሊቆ ቃላ
ሃሳይዛ አሲ
ቢራን ሚሼቲዳ
ማና ሚሻ ማላ።
- 24 ጌኔ አሲ ባ ዶናን ጨሚስ፤
ጊዶ ኦቲን ባ ዎዚናን
ኢታቴሐ ጸንቴስ።
- 25 ኢዛ ዎዚናን ላፑን ቱናቴሊ
ኩሚ ኡቲዴስ፤
ሄሳ ጊሻስ ኢዚ
ሎኦ ቃላ ሃሳይኮካ
ኦማኖፓ።
- 26 ኢዚ ባ ጌኔ ባሌሶን
ጌንፋናስ ዳንዳዬስ፤
ጊዶ ኦቲን ኢዚ ኦሊዳ
ኢታቴሊ ዱላታን ቆንጫና።
- 27 ሃራታስ ኦላ ቦኪዛ አሲ
ሄ ኦላን ባሰ ኩንዳና፤
ሃራታ ቦላ ሹቕ
ቡሉሊዛ አሳ ቦላ

ሄ ሹቻይ ሲሚ
 ኢዛ ቦላ ኩንዳና።
 28 ዋርዶተዛ ኢንጻርሲ
 ባ ቆሂዳ እሳታ ኢጸዉሰ፤
 ጨሚዛ ሜቴርሺካ ባሽ ኤሃዉሰ።

27

1 ዋንቶይሳን ጨቄቶፋ፤
 ዋንቶ አዚ ሃናናኮ
 ኔ ኤራካ።
 2 ኔና ሃራ አሲ ጋላቶፔ አቲን
 ኔርካ ኔና ጋላቶፓ፤
 ሃራ አሲ ኔና ሳቦፌ አቲን
 ኔኒ ኔርካ ኔና ሳቦፋ።
 3 ሹቺ ዳጾ፤
 እንጮይ ቶኮ፤
 ጊዶ አቲን ኤያ አሲ
 ዴንፊዛ ኦሺ
 ናምኣታፔካ ዳጾሰ።
 4 ሸኔይ ሜንጾ ኢታ፤
 ሃንቆይ ሜንጾ ኢታ፤
 ቃናቴ ሲንፋን ኤቂ
 ዳንዳያናይ ኦኔ?
 5 ጌሚዳ ሲቆፔ
 ቆንጨን ሴሪዛ ሴራይ ሎኦ።
 6 ዋርኬይ ኔና ዳርቶ ዬራናፔ
 ሲቆይ ኔና ዳቺዛይሲ ኪያ።
 7 ካሊዳ አሰ ኤሳ ኢሊሎይ ኢቴሰ፤
 ጊዶ አቲን ጋፊዳ አሰ
 ጋራ ማላ ጫሚዛ
 ሚሺካ ማልኤሰ።
 8 ባ ሶ እጊዱ ዩዱዛ አሲ፥
 ባ ኬፋፌ ሃካ ፓሊዛ
 ካፎ ማላ።
 9 ሺቶይኔ ኤጾኔይ
 አሰ ኡፋይሲዛይሳ ማላ፥
 ሲቆ ላጌ ዞሬይካ ኡፋይሴሰ።

- 10 ኔ ላጌኔ ኔ አዋ ላጌ አጎፋ፤
ኔ አሻኮ ቦፓ።
ሃሆን ዲዛ አሻፔ
ኔሰ ማታን ዲዛ
ሾሮይ ኪያ።
- 11 ታ ናዙ!
ኔኒ አፆ ኤራንቻ ጊዳ፤
ታ ዋዚና ኡፋይሳ፤
ሂሰቲኮ ታና ካፂዛይታ
ኦይሻካ ዛራና።
- 12 ጨንጫ አሲ ሜቶይ ዪዛ ዋዴ
ቤኢዲ ቆቴቴሰ፤
ጊዶ አቲን አኬካይ ፓጪዳ አሲ
ሜቶ ጋርሰ ቢ ጌሌሰ፤
ሂሰቲዲ ጉዬፔ ቆሄቴሰ።
- 13 ኤሮንታ አሳሰ ሁርቡታ ጌሊዛ
አሳ ማይኦ ቃራ ኤካ፤
ሃዉሻ ማጫሳሰ ዋሴ ጌሊዛ
አሳ ማይኦ ኦይካ።
- 14 ማላዶ ዋንታራ
ባ ቃላ ጶቁ ሂሰቲዲ
ባ ሾሮ አንጀይ
ቃንጌላ ማላ ቆዴቴሰ።
- 15 ኡባ ዋዴ ኦሽ ኦዬቲዛ ማቻ
ኢራ ጋላሰ ፓጩይ ባይንዳ
አሊዛ ኬላ ማላ።
- 16 ጫርኮ ቴቃናሰ ዋይኮ
ዛይቴ ጨጨሚዲ ኦይካናሰ
ዳንዳዬቶንታይሳ ማላ
ኢዞ ጮኡ ኦላናሰ
ዳንዳዬቴና።
- 17 ቢራታይ ቢራታ ቃራሲዛ ማላ
አሲካ ኢሶይ ኢሳ ቃራሴሰ።
- 18 ባላሴ ሚላዮ
ኢሻልሲዲ ናጊዳ አሲ
ኢዚ ኦይፌ ማና፤
ባ ጎዳሰ ኦሊዛ
አሲ ቦንቼታና።

- 19 ሃላይ ሄሬጋሶ
ሰንሰ በሰዛ ማላ
አሳ ዋዚናይ
ኢዛዴ ካንዶ በሰሰ።
- 20 ሃይቆይኔ ባሺ ካሊ ኤሬቴና፤
ሄሳሶካ አሳ አይፌይ ካሌና።
- 21 ቢራይኔ ዋርቃይ ታማን ፓጩቲዳ
ጌይዛ ማላ
አሰካ ባ ኤኪዛ
ጋላታን ፓጩቴሰ።
- 22 ኤያ አሰ ካላ ማላ
ኡዱላን ዩጋዳ፥
ኡዱላ ሚላን ጫዲዛኮካ
ኢዛፔ ኤያቴላ ኪቺና።
- 23 ኔ ደርሳቲ ዳኢዛ ሃኖታ
ሎኤላዳ ኤራ፤
ኔ ዉዴካ ዋዚናፔ ሄማ።
- 24 አይሰ ጊኮ
ዱሬቴላ ሜርናሰ ዳኤና፤
ካላቻይካ ዩሌታፔ
ዩሌታ ጋካናሰ
ሚኒ ዳኤና።
- 25 ሜላ ማታይ ቡጩቲዳፔ፥
አጫ ማታይ ኬኢዳፔ፥
ዙሞቡላታ ቦላን ዳኢዛ ማታይ
ሸቂዳፔ ጉዩን፥- 26 ደርሳታ ኢሰኬፌ
ኔኒ ኔሰ
ማይኦ ኬሳና፤
ዳይሻታን ኔሰ
ኅሻ ጋዴ ሻማና።
- 27 አቲዳ ዳይሻታ ማላ
ኔሰኔ ኔ ሶ አሳሰ፥
ኔ ማጫ አይሌታሰካ
ቁማ ጊዳናሰ
ኩሚ ፓላሃና።

28

- 1 ኢታ አሲ ኦኒካ
 ዬዴሶንታ ባቃቴሰ፤
 ጊዶ አቲን ጸሎይ
 ጋሞ ማላ ዋዚና ኩሜላ።
- 2 ዴሬይ ማካሊኮ
 ሃሪዛይ ጮራቴሰ፤
 ጊዶ አቲን ኤራ አሲኔ
 አኬኪዛ አሲ ዋጋ ኤሴሰ።
- 3 ሂዬሳታ ኡንኤሊዛ ዳናይ
 ካል ዳይሲዛ
 ዋልቃማ ኢራ ማላ።
- 4 ዋጋ ቦንቾንታ አሲ
 ሞራንቻታ ሳቤሰ፤
 ጊዶ አቲን ዋጋ ቦንቹዛይ
 ኢሰታ ቆፋ ፓልቄሰ።
- 5 ኢታ አሳታሰ ሱሬ ፒርዳይ ጌሌና፤
 ጊዶ አቲን ጎዳሰ ጎይኒዛይቲ
 ኡባካ ኤሬቴሰ።
- 6 ጌላ አሰ ጊዱ ኡቲዱ
 ዱሬ ጊዳናፔ
 ቦሬይ ባይንዳ ሂዬሳ
 ጊዴሊ ሎኦ።
- 7 ዋጋ ናጊዛ ናይ አኬካንቻ፤
 ጊዶ አቲን
 ጋንጃማታራ ዙፔቲዛይ
 ባ አዋ ዬላሴሰ።
- 8 ቤሶንታ ዲሾን
 ባ አቆታ ዳጋሲዛ አሲ
 ሄ አቆታ ሂዬሳሰ
 ኪዪዛ አሳሰ ሺሼሰ።
- 9 ዋጋ ሲያናፔ ባ ሃይል
 ዋራ ዛሪዛ አሳ ዋሳይ
 ጸሳ ሃራሴሰ።
- 10 ሱሬታ ኢታ ኦጌ ካሌሊዛ አሲ
 ባ ቦኪዳ ኦላን ኩንዳና፤
 ጊዶ አቲን ጌሻ አሲ
 ሎኦ ሚሽ ላታና።

- 11 ዱሬ አሲ ባና
 አጽ ኤራንቻ ጊዲ ቆፔሰ፤
 ጊደ አቲን አኬካይ ዳኢዛ
 ሂዬሳይ ኢዛ ፓጩሰ።
- 12 ጸሎተ ጸኒዳ ዋዴ አሳይ
 ኡባይ ኡፋዬቴሰ፤
 ጊደ አቲን ኢታቲ ማታ
 ኦይኪዳ ዋዴ አሳይ ባቃቴሰ።
- 13 ባ ናጋራ ጌንፊዛ አሲ አጩና፤
 ጊደ አቲን ፓጸዛይኔ
 ናጋራ አገዛይ ማሬታና።
- 14 ጎዳሰ ኡባቶ
 ያዪዛ አሲ አንጃቲዳዴ፤
 ጊደ አቲን ባ ዋዚና ዳማሲዛ
 አሲ ሜቶን ጌላና።
- 15 ሂዬሳ ሃሪዛ ኢታ ዳናይ
 ጸገዛ ጋሞኔ
 ጉፒ ኦይኪዛ ዛርዶ ማላ።
- 16 ዋዚናይ ፓጪዳ ዳናይ
 ሜንጼ ኢቴሰ፤
 ጊደ አቲን ቤሶንታ
 ጎኦ ኢጸዛዴይ
 ዳሮ ላይሰ ዳኤሰ።
- 17 አሰ ዋዲዳ አሲ ሃይቃና
 ጋካናሰ
 ቶይላቲሼ ዳሰ፤
 ኢዛ ኦኒካ ሺሺ ኤኬና።
- 18 ቦሬይ ባይንዳ ሄሜቲዛ አሲ
 ቆሄቶንታ አታና፤
 ጊደ አቲን ጌላ አሲ
 ኢሲ ጋላሰ ኩንዳና።
- 19 ባ ጋዴ ጎዪዛ ሚኖ አሲ
 ካሰ ካሌሰ፤
 ጊደ አቲን ሃዳ ዮኦ ካሊዛ አሲ
 ማንቆቴላፌ ኬኢና።
- 20 አማኔቲዳ አሲ ኬሂ አንጃታና፤
 ጊደ አቲን ዱሬታናሰ ጃሚዛይ
 ቃጸዬቶንታ አቴና።
- 21 ሻኪዲ ማዶይ ሎኤና፤

- ጌዶ አቲን አሲ ጉላ ካላሰ
ጌዲ ሞሮ ኦሌሰ።
- 22 ኡዜቲዛ አሲ ዱሬታናሰ ጃሜሰ፤
ባና ሂዬሳቲሊ
ኦይካናይሳካ ኤሬና።
- 23 አሰ ጮ ሳቢዛ አሳፔ
ሴሪዛ አሲ ጉዬፔ ዶሴቴሰ።
- 24 ባ አዋፔኔ ባ አይፔ ካይሲዲ፥
«ታኒ አይኮካ ናጋራ
ኦላቤኬ» ጌዛ አሲ
ባሺዛ አሳራ ኢሲ ማላ።
- 25 ዪቄይ አሲ ኦሽ ዴንሌሰ፤
ጌዶ አቲን ጎዳን
አማኔቲዛይ አንጃቴሰ።
- 26 ባናን አማኔቲዛ አሲ ኤያ፤
ጌዶ አቲን አጼ ኤራቴላን
ሄማቲዛይ ሳሮን ዴኤሰ።
- 27 ሂዬሳሰ አሚዛ አሳሰ ፓጩና፤
ጌዶ አቲን ኢሰቲ
ቤኢሺ ቤኦንታሶ
ሃኒዛዴ ቃንጌሊ ጋካና።
- 28 ኢታ አሳቲ ማታ ዴሚዛ ዋዴ
ዴሬይ ባቃቴሰ፤
ጌዶ አቲን ኢሰቲ ጳይዛ ዋዴ
ዲሎቲ ጮራቴቴሰ።

29

- 1 ዳሮ ዋዴ ሴሪን ኢዲዲ
ባ ሞርጌ ዞዲሲዳ አሲ
ሃሳኦንታ ሜቃና፤
ሄሳዴሰ ፓጹቴሊካ ዴና።
- 2 ዲሎ አሳቲ ማታ ኦይኪዛ ዋዴ
አሳይ ኡፋዬቴሰ፤
ጌዶ አቲን ኢታ አሳቲ
ቢታ ሃሪዛ ዋዴ አሳይ ኦሌሰ።
- 3 አጼ ኤራቴላ ዶሲዛ አሲ
ባ አዋ ኡፋይሴሰ፤
ጌዶ አቲን ላይማታራ ላጌቲዛይ
ባ አቆታ ጳይሴሰ።

- 4 ቱማ ፒርዲዛ ካዎይ
 ባ ዴሬ ዎፑ ሂሰቴሰ፤
 ጊዶ ኣቲን ማታኤ
 ማናሰ ዪቄቲዛይ
 ባ ዴራ ሳሌሰ።
- 5 ባ ላጌዛሰ ጨዋ ሃሳይዛ ኣሲ
 ኢዛ ቶሆሰ ዎጺማዶ ዋጼሰ።
- 6 ኢታ ኣሲ ባርካ
 ባ ናጋራን ኦይኬቴሰ፤
 ጊዶ ኣቲን ጸሎ ኣሲ
 ኡፋይቴሰኔ ዬጼሰ።
- 7 ጸሎ ኣሲ ሂዬሳታሰ
 ሱሬ ፒርዲይ
 ፒርዴታና ማላ ቆፔሰ፤
 ጊዶ ኣቲን ኢታ ኣሲ
 ሄሳ ማላ ዉዲካ ጌና።
- 8 ሚሪዛይቲ ካታማን
 ሺሮ ዴንፊቴሰ፤
 ጊዶ ኣቲን ኣጵ ኤራቴሊ ዲዛ
 ኣሳቲ ሃንቆ ኢሪዲሴቴሰ።
- 9 ኣጵ ኤራቴሊ ዲዛ ኣሲ
 ኤያ ኣሳራ ፒርዳሶ ቢኮ
 ኤያይ ሃንቄቴሰኔ ቂዴሰ፤
 ኢዛሰ ሳሮይካ ዴና።
- 10 ሱል ጉሳናሰ ጃሚዛ ኣሳቲ
 ሱሬ ኣሰ ኢጾቴሰ፤
 ቃሴ ጸሎ ኣሳካ
 ዎጾናሰ ኮይቴሰ።
- 11 ኤያ ኣሲ ዛዋይ ባይንዳ ሃንቄቴሰ፤
 ጊዶ ኣቲን ኣጵ ኤራንቻይ
 ባ ሃንቆ ሚቴሰ።
- 12 ዴሬ ሃሪዛዴይ
 ዎርዶ ዮኦ ኤኪኮ
 ኢዛ ሹሜቲ ኡባይ
 ኢታ ጊዴቴሰ።
- 13 ሂዬሳይኔ ኣሰ ናቂዛዴሰ
 ኮፋ ሚሺ ዴሰ፤
 ጎዳይ ናምኣታሰካ
 ጼሊዛ ኣይፌ ኢሚዴሰ።

- 14 ኢሲ ካዎይ ሂዬሳስ ሱሬ ፒርዲኮ
ኢዛ ካዎቴላ አራታይ
ሚርናስ ሚኒ ዳና።
- 15 ጸንዲቂ ዲሾይ ናይታስ
አጽ ኤራቴሰ አሜሰ፤
ጌዶ አቲን ዬዳ ዲጨዳ ናይ
ባ አዮ ካወሼሰ።
- 16 ኢታ አሳቲ ማታ ኮይኪዛ ዎዴ
ናጋራይ ዳሬሰ፤
ጌዶ አቲን ጸሎቲ
ኢስታ ኩንዴላ ቤአና።
- 17 ኔ ና ሴራ፤
ሂስቲኮ ኔኒ ሳሮ ዴማና፤
ኢዚ ኔና ኡፋይሳና።
- 18 አጃታይ ባይንዳሶን
ዴሬይ ዬዳ ዳና፤
ጌዶ አቲን ዎጋ ናጊዛ
አሲ አንጃቲዳዴ።
- 19 አሽካራይ ጮ ዶናን ዮቲን
ጸላ ኤሬና፤
ዮኦይ ኢዛስ ጌሊዛኮካ
ኢዚ አዛዜቴና።
- 20 ኤሶን ሃሳይዛ አስ ቤያይ?
ኢዛፔ ኤያ አሳስ ሂዶታይ ዴሰ።
- 21 አሲ ባ አይሌ
ናቴቴላፌ ዶሚዲ
አልኢሶን ዲቺኮ
ወርሴላን ኢዛዴ ቦላ
ጨጨይ ጋካና።
- 22 ሃንቂቲዛ አሲ
ኦሽ ዴንጮሰ፤
ኤሌ ዩሎቲዛ አሲ
ዳሮ ናጋራ ኦጼሰ።
- 23 ኦቶሮይ አስ ካወሼሰ፤
ጌዶ አቲን
አሽኬቴሌ ቦንቺሴሰ።
- 24 ካይሶራ ዙፔቲዛ አሲ
ባና ኢጺዛ አሳ፤

- ቃንጊ ጫቂሲሺን ሲዪሸካ
ኢዚ ጮኡ ገሰ።
- 25 አሳሰ ያዪዛይሲ
ኢዛዳሰ ዋጺማዴ ገዳሰ፤
ጊዶ አቲን
ጎዳን አማኔቲዛ አሲ
ሳሮን ዳኤሰ።
- 26 ዳሮቲ ዳሬ ሃሪዛይታ ሲንላን
ኤሬታና ኮዬቲሰ፤
ጊዶ አቲን አሳሰ ሱሬ ፒርዳይ
ጎዳ አቻፌ ቤቲሰ።
- 27 ጸሎቲ አሰ ባሌላዛይታ
ሻቲቲቲሰ፤
ኢታቲ ሱሬ አሳታ ኢጾቲሰ።

30

- አጉሬይ ሃሳይዳ ሌሚሶታ
- 1 ሃይሳፌ ካሊዲ ጳፌቲዳይሲ ያቄ ና አጉሬይ ሃሳይዳ
ሌሚሶታ።
አጉሬይ ኢቲኤሌሲኔ
ኡካላሰ ሃይሳ ሃሳይዳሰ።
- 2 «ታኒ አሳ ኡባፌካ ኤያ ዳራይሰ፤
አሳሰ ዳኢዛ አኬካይ ታሰ ባዋ።
- 3 ታኒ አጽ ኤራቲላ ታማራቤኬ፤
ጌሻዛ ጌሻሲካ
ታኒ ኤሪዛ ሚሺ ዳና።
- 4 ሳሎ ፑዴ ከኢዲ
ዱጌ ዋጲዳይ ኦኔ?
ጫርኮ ባ ኩሸን ኦይኪዳይ፥
ሃላ ባ አፋላን ዪጨዳይ
ሳኣ ጋጸ ኢዛ ሶን ሶን
ዋሊዳይ ኦኔ?
ኦኔ ኤሪኮ ኢዛ ሱንላ ታሰ ዮታ፤
ኢዛ ናዛ ሱንላ
ኦና ጌቲቲዜ?
- 5 «ጸሳይ ዮቲዛ ቃላይ

- ኡባይ ቱማ፤
ኢዛን አማኔቲዛ ኡባሰ
ኢዚ ጎንዳሌ።
- 6 ኢዛ ቃላ ቦላ አይኮካ ጉጆፋ፤
ጉጆኮ ኢዚ ኔና ሴራና፤
ኔኒ ዋርዳንቻ ጊዲዳይሳካ
ኢዚ ቆንጨሳና።
- 7 «ጎዳዉ! ታኒ ኔና
ናሞኡ ሚሽ ኦይቻይሰ፤
ታኒ ሃይቃና ጋካናሰ
ኢሰታ ታና ዲጎፋ።
- 8 ታኒ አሰ ጨሞንታ ማላኔ
ዋርዶ ሃሳዮንታ ማላ
ታና ናጋ፤
ታና ዲሬ ዋይኮ
ማንቆ ሂሰቶፋ፤
ጊዶ አቲን ሃቺሰ ሃቺሰ
ጊዲዛ ካሉ ታሰ ኢማ።
- 9 ሂሰቶንታ አጊኮ
ታኒ ኬሃ ካላዳ ኔና ካዳና፤
ጎዳይ ኢዚ ኦኔ? ጋና፤
ዋይኮ ማንቃዳ ካይሳና፤
ሂሰታዳ ታኒ ጸሳ
ሱንላ ጫይሳና።
- 10 «ኔና ቃንጎንታ ማላኔ
ኢዚ ቃንጊን ኔሰ
ጎማቶንታ ማላ፤
አይሌ ኢዛ ጎዳ ሲንላን
ኢታን ዴንፎፋ።
- 11 ባ አዋ ቃንጊዛኔ
ባ አዮካ እንጆንታ
ዬሌታይ ዴሰ።
- 12 ቱና ጊዲ ኡቲዲ
ባንታና ጌሻ ማላ
ቆዲዛ አሳቲ ዴቲሰ።
- 13 ኦቶሮን ኩሚዳ አሳቲኔ
አሰ ካፂዲ ዴሊዛ አሳቲ ዴቲሰ።

- 14 ሂዩሳታኔ ሜቶታንቻታ
ዳሬ ገደፌ ጳይሳናስ
ኢስታ ኣቻይ ማሻ ማላ ገዲዳ
ኢስታ ጋገናይ ቢላማ ማላ
ገዲዳ ኣሳቲ ዴቴስ።
- 15 «ኡሎስ ናሞኡ ማጫ ናይቲ ዴቴስ።
ኢስቲ፥ ሓስ ኢማ! ኑስ ኢማ!
ገዲ ዋሴቴስ።
ሙሌካ ካሊ ኤሮንታ
ሄሻቲ ዴቴስ፤
ኦይዳንሉዚ ቃሴ ሙሌራ፥
ፈገዳና፥ ገ ኤሬና።
- 16 ሄሳንቲካ ዱፎ፥ ማይኒዳ ኡሎ፥
ሃሊ ካሊ ኤሮንታ
ሚላ ቢታኔ፥
ፋታስ ገዳና!፥ ገ ኤሮንታ ታማ።
- 17 «ባ ኣዋ ቂዲዛ ና ኣይፌኔ፥
ባ ኣዮ ካዲዛ ና ኣይፌ
ኬልካን ዴኢዛ ቁሮቲ ዋጫና፤
ኢዛ ኣሾዛ ኣንኮቲ ማና።
- 18 ታና ኬሂ ማላሊሲዛ
ሄሹ ሚሻቲ ዴቴስ፤
ኦይዳንሉዚ
ኡባራካ ታስ ጌሌና።
- 19 ሄሳንቲካ ጎሌቲ
ሳሎራ ፓሊዛ ፓሎ፥
ሾሺ ሹቻ ቦላራ
ሶሎሉ ገ ቡስ፥
ማርካቤይ ኣባ ቦላራ ቢዛ
ቡስ ኣዴይ ማጫ ና ሲቆ
ዴማናስ ሃኒዛ ሃኖታ።
- 20 «ላይማ ማጫሳያ
ሃኒዛ ሃኖይካ
ሄሳ ማላ።
ኢዛ ሙሳ ማዉስ፤
ገዶ ኣቲን ሚዳፔ ጉዬን፥

ባ ደና ቁጫዳ፥
 ሩታኒ ኣይኮካ
 ሞራቤኬ፥ ጋዉሰ።

- 21 «ሄሹ ዮኦታን
 ቢታይ ቃጾሰ፤
 ኦይዳንሐዛ ኡባካ
 ቶካናሰ ዳንዳዬና።
- 22 ሄሳንቲካ ኣይሌይ ካዋቲዳ ዋዴ፥
 ኤያይ ካሐ ካሊዳ ዋዴ፥
- 23 ኣሲ ኢጺዳ ማጫሳያ
 ኣዴ ጌሊዳ ዋዴ፤
 ማጫ ኣሽካሪያ ባ ኅዳቴዮ
 ላቲዳ ዋዴ ሃኒዛ ሃኖታ።
- 24 «ሳኣ ቦላ ኦይዲ
 ጉላ ሜዴታቲ ዴቴሰ፤
 ጌዶ ኣቲን ኢሰቲ
 ኬሂ ኣዶ ኤራንቻታ።
- 25 ሄሳንቲካ ጨንጫሌቲ
 ዋልቃይ ባይንዳ ሜዴታ፤
 ጌዶ ኣቲን ባንታሰ ሚዛ ሚሽ
 ቦኔ ሸሺ ዳጋሴቴሰ።
- 26 ጉፓሌቲ ጉላ
 ዋልቃይ ዴኢዛይታ፤
 ጌዶ ኣቲን ባንታ ኬሐ
 ዛላ ጌዶን ኬጾቴሰ።
- 27 ቦሌታሰ ካዋይ ዴና፤
 ጌዶ ኣቲን ኢሰቲ ኡባይካ
 ማራን ማራን ዛቴቴሰ።
- 28 ዛሬቲ ኩሸን
 ኦይከንካ ኦይኬቴቴሰ፤
 ጌዶ ኣቲን ኢሰቲ
 ካዋ ኬላንካ ዴኤቴሰ።
- 29 «ባንታ ማታ ቤሲሺ ሄሜቲዛ፥
 ሄሹ ሜዴታቲ ዴቴሰ፤
 ኦይዳንሐዛ
 ፑላቲዲ ሄሜቴሰ።

- 30 ሄሳንቲካ ዶኣ ኡባፌ
 ዋልቃማኔ
 ኣይኮሰካ ያዩዲ
 ባቃቲ ኤሮንታ ጋሞ።
- 31 ማጫሳታ ጊዳን ኮሶሲ
 ሄማቲዛ ኣዴ ኩቶ፥
 ዴይሻ ኦርጌኔ
 ባ ኦላንቻታን
 ኣጃቤቲዳ ካዎ።
- 32 «ኔኒ ኤያዳ
 ኦቶሬቲዳ ጊዲኮኔ
 ኢታ ሚሽ ኦፋናሰ
 ሃልቺዳ ጊዲኮ
 ኣኔ ታኪ ጋዳ ቆፓ።
- 33 ማሊ ቡኪን ኦይሲ ኬኢዛ ማላ፥
 ሲዴ ኢጨንካ
 ሱሊ ዪዛ ማላ
 ሃንቆ ዴንፊሊኮ
 ኦሽ ሜዴሰ።»

31

ካዎ ሊሙኤሌ ኣያ ባ ናዛሰ ኢሚዳ ቲሚርቲ

¹ ካዎ ሊሙኤሌ ኣያ ካዎ ሊሙኤሌ ታማርሲዳ ቲሚርቲይ
 ሃይሳፌ ካሊዳይሳ።

² «ታ ናዘ!
 ታ ኡሎፔ ዋዲዳ ታ ናዘ!
 ታኒ ኣዲኔታ ዩሊዳ ታ ናዘ!

³ ማጫሳን ኔ ዋልቃ ዉርሶፋ፤
 ካዎታ ባሺዛ ሚሻን
 ኔ ኣካታ ዳይሶፋ።

⁴ «ሊሙኤሌ ሃይሲ ካዎታሰ
 ቤሴና፤
 ካዎቲ ዋይኔ ኡሹ
 ኡያናሰ ቤሴና፤
 ዴሬ ኣይሲዛይቲ
 ማሶሲዛ ኡሹ

- ያሬታናስ ቤሴና።
 5 ኢስቲ ኡዪዛ ዋዴ ዋጋ ባሌቴቴስ፤
 ቆሄቲዳይታ ማታ ሱጌቴስ።
 6 ሃይቃና ሃኒዛይታስ
 ማሶሲዛ ኡሹ
 ሜቶ ቦላ ዲዛይታስ
 ዋይኔ ኡሹ ኢሚቴ።
 7 ኢስቲ ኡዪዲ
 ባንታ ማንቆቴላ ደጌቶ፤
 ባንታ ቱጋካ ዛሪ ቆፖፌቶ።
 8 «ባንታ ጊሻስ ሃሳያናስ
 ዳንዳዮንታይታስ
 ኔኒ ሃሳያ፤
 ሜቶታንቻታ ማታ ጊሻስ
 ኔኒ ሞቴታ።
 9 ሃሳያዳ ኢስታስ ሱሬ ፒርዳ ፒርዳ፤
 ሂዬሳታኔ
 ሜቶታንቻታ ማታ
 ቦንቺሳ» ጋዳ ታማርሳዱስ።

ዋዚናማ ማቾ

- 10 ዋዚናማ ማቾ
 ኦኒ ዴማናዉ ዳንዳይዜ?
 ኢዛ ዞኦ ኢንቁፌካ
 ኬሃ አቆዉስ።
 11 ኢዚ ኬላ አዋይ
 ኢዞ ኡባ ሚሻንካ
 አማኔስ፤
 ኢዛስ አይኮይካ ፓጩና።
 12 ኢዛ ባ ዴኦ ላይሰ ኡባን
 ኢዛስ ሎኦ አቲን
 ኢታ ሚሽ ኦሉኩ።
 13 ዶርሳ ኢስኬፌኔ
 ታልባ ቡጻ ኤካዳ፤
 ኦሶ ዶሲዛ ባ ኩሼን ሱቃዉስ።
 14 ኢዛ ዛልኣንቻታ ማርካቤ ማላ፤

- ባ ካል ሃኮ ቢታፌ ኤሃወሰ።
- 15 ኢዛ ባ ሶ አሳሰ
 ቁማ ካፋናሲኔ
 ባ ማጫ አይሌታሰ
 ኦሶ ሻካ ኢማናሰ፤
 ሳአይ ቡሮ ዋንታና ጊሺን
 ዴንዳወሰ።
- 16 ኢዛ ባርካ ቆፓዳ
 ጎሻ ጋዴ ሻማወሰ፤
 ባ ዴሚዳ ሚሻን
 ዋይኔ ቶካወሰ።
- 17 ኢዛ ሚናዳ ባ ኦሶ ፖላወሰ፤
 ኢዚ ቄሴቲካ ኦሶሰ ሚኖ።
- 18 ኢዛ ባ ኦሶሰ
 ዋጼይ ዲዛይሳ አኬካወሰ፤
 ኦማርሲካ ኢዚ ጸምፔይ ቶኤና።
- 19 ኢዛ ባ ሊቃቃን ሱቃወሰ፤
 ባ አፋላ ዳዳወሰ።
- 20 ኢዛ ሂዬሳታሰ ባ ኩሼ ሚጫወሰ፤
 ሚቶታንቻታሰ
 ከያቴል ኢማወሰ።
- 21 ኢዚ ሶ አሳይ ኡባይ
 ሆኢዛ ማይኦ ማይኢዳ፤
 ሄሳ ገሻሰ ኢዛ
 ሻቺ ቡኪኮካ ሂርጉኩ።
- 22 ሂላን ኦንጊዛ
 ማይኦ አላወሰ፤
 ላይኖኔ ኦቻ ቴራ ሚሳቲዛ
 ማይኦ ማይኣወሰ።
- 23 ዴሬ ጨማቲ ዲቡሻ ሺቂዛሶን
 ኢዚ ኬላ አዋይ
 ቦንቹቲዳ አሳ።
- 24 ላይኖፔ ሴሎ ማይኦታ
 ኦላዳ ባይዛወሰ፤
 ዛልኦንቻታሰካ ዳንጮ
 ዳዳ ሺሻወሰ።
- 25 ኢዛ ሚኖኔ ፑላራ ዲዛ ማጫሳ፤
 ኢዛ ዪዛ ላይላታ

- ኡፋይሳን ሞካወሰ።
 26 አጽ ኤራን ኢዛ ሃሳያወሰ፤
 ኢዚ ኢንጻርሳፌ
 ሱሬ ዘሬይ ኬኤሰ።
 27 ኢዛ ባ ሶ አሳ ሃኖ
 ሎኤፋ ካላወሰ፤
 አዛላ ሃኖይ ኢዚ ቦላን
 ቤቲ ኤሬና።
 28 ኢዚ ናይቲ ኢዞ፤
 «አንጃቲዳሬ» ጌቲሰ፤
 ኢዚ ኬፋ አዋይካ
 ኢዞ ጋላቲሼ፤
 29 «ሎኦ ሚሽ ኦሊዳ
 ዳሮ ማጫሳቲ ዴቲሰ፤
 ጌዶ አቲን ኔኒ ኢሰታ
 ኡባፌ አታሳ» ጌሰ።
 30 ማላ ሎኦይ ባሌሐሰ፤
 ፑላይካ ቆኬሰ፤
 ጌዶ አቲን ጎዳሰ ያዪዛ
 ማጫሲ ኢዛ አንጃቲዳሮ።
 31 ኢዚሰ ቤሲዛ አሞታ አሚቲ፤
 ኢዛ ኦሊዳ ኦሶይ ኡባይ
 ዱቡሻን ኢዞ ጋላቲሶ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b